

Sèsî wenaamá Mádíkì wàhaà-ma

Cetá Kamámá

Mádíkì-dà wàhaà wemà mèmà péé-mà ye pòkàtà mentà kú mehekà. Ò de pú yòn Sèsî tontondikó. Ò de noò-nà Pódì-dà o cànçi dódì meheká kà pà cakú Weèdi wemá. Ò mèe te de tempáa-nà-á-ma Píyèè Weèdi tòmú meheká. O kú pesá-dà ò de tód-ma wemà ò wàhaà-mà o pòkàtà mehekà.

Mádíkì de tà wàhaà weèdoòpa mèm̀pà pú yòn-pa-dà Sùwífùpa, ye kú kpémú-dà tee k'ò de wekànì Sùwífùpa bookú paáma. Ò de tà wàhaà è kpèi é beka mèm̀pà k'òò kàn-pá è yò Kídìsì-dà héé Weèdi bíitá, è dehú è pú wénì Weèdi nà nìpa kpémú. O nònfa de còmú Sèsî pakú-na dehèna hínka-dà, ye kú kpémú-dà tee k'ò bekú Sèsî k'ò kpekànì m̀kàpa, è wékànì pèèpa kà nìku dódì yon. Ye kú póǹtátònà-dà de bekú è yò ò yòn Weèdi. Sèsî há de pú boh̀ta wekànámá o dehèna meheká, àmá ò de yáá-ma è yò ò t̀eni è kó dii nánkú-dà, é kpíí é dontá nìku dódì.

Sèsî de cetá o toná Kàdìdèè tempáaku meheká-dà é nà dèhà Sèdisàdèm yotí, Sùdèè tempáaku meheká. Ye pesá-dà ò kó taá é kpíí-ma kpíidokú hínka nìku weñni kpémú, kà p'òò dáná, o dataáadi k'ó yántá é òisi hínka.

Mádíkì pú wedà o pòkàta meheká Sèsî bíkám̀bíikú wemá, a mèe pú kó déhá bèmbèni nìc̀nì kà Sèsî cakú nìpa wemá kà mà deu. Àmá m̀i héé-sa tíkama, m̀kàpa kpekànámá nà nònòhicí, ye kú wemà-dà sùn ta meheká. Wòni nìc̀ ò h́ wekàna-á-ma yèc̀i wenaamá pòkàhi tóhì pú weè-sa kú hínka. Pà kodà o pòkàta wemá kà má n'yòn weyuùka kàkòò-dà. Ǹte-kà:

Mk 1.1-13 : Wemá cetádi nà Sèsî tòmú sòdo dèhàma.

Mk 1.13 háá 8.26 : Sèsî púkàama o tòmú Kàdìdèè tempáaku meheká. Ò kpekànà m̀kàpa, é paá póǹtápaáma, ò bàtà o dapàm̀ma, é biòhàna Weèdi wòòti hínka nà webemú yohènamá.

Mk 8.27 háá 10.52 : Sèsî n'òo dapàm̀ma yòn Sèdisàdèm béka.

Mk 11 háá 13 : Sèsî tòmú Sèdisàdèm meheká.

Mk 14 háá 15 : Pà cèè Sèsî, é deèna nùdi è yò p'òò kòù, òò kpéí kpíidokú hínka.

Mk 16 : Sèsî yántáma kpíipa meheká.

¹ Ìnte Weèdi bíítá Sèsî Kídísí^a Wenaamá cetà-sa. ² Weèdi weténáko Èsàyî pòkàta meheká pà wàtà yò:

N kó nihìna n tontòndikó a yìhìka,
k'ó dònà a còku.

³ Nìi boòku-dà kpákádí cawenkú meheká è tonà:

Dònà-nà Teó còku. Cókàna-nà o còci.

⁴ Mémá-dà, kà Ìsá-Bàtìsì é tènì cawenkú meheká è bekànì è tonà: Cehèna-nà fòumu é héé ká n ne cóntá k'yé teha kà Weèdi é ne deèda ne s̄ĩma.

⁵ Kà Sùdèè tempáaku nìpa weñni nà Sèdisàdém kpéepá weñni é n'kòdì-ní o pesá. Pà de h̄j bantáma pa s̄ĩma nìku weñni yìhìka, kà Ìsá-Bàtìsì m̄e té pà cóntá Sùt̄t̄t̄ kónkú meheká.

⁶ Ìsá-Bàtìsì de bádí b̄namáku kp̄imu tókèdi-dà è c̄jú nawònf̄a o kòuka. Ò de yonti kádáaka-dà nà ceèti. ⁷ Ò de cakú nìpa Weèdi wemá è toò: Òc̄j̄n pení n dàhàka è n kpenì-nà déd̄éí. N pú s̄anà n kó bueí-má é dákátá o nèùti nawònc̄i. ⁸ Mmí, n ne cómù nà néemá-dà, àmá menn kó ne n'cómù nà Seèwendí-dà.

Sèsî cónti n'òo beńma

⁹ Ye kú daàka meheká, kà Sèsî é yí-ní Nasàd̄étì yotí, kà tì péé Kàd̄id̄éè tempáaku meheká é tènì kà Ìsá-Bàtìsì òò cóntá Sùt̄t̄t̄ kónkú meheká. ¹⁰ Ò yèti-ní t̄j̄n wòni néemá meheká, é déhá kà h̄j̄nka é kpetá kà Seèwendí cútá-ní o h̄j̄nka è yònà p̄ànd̄òdi. ¹¹ Kà pá yekà nà h̄j̄nka-ní, Weèdi boòku kà kù tonà: A yòn n bíid̄ókàta-dà kà n yàma weñni péé a h̄j̄nka.

¹² Ye pesá n'èe pesá, kà Seèwendí òò túdí òò tanà cawenkú meheká. ¹³ K'ó p̄á daàka púnàhì ku meheká, kà Weèkupá wódo òò beń è k'òò yehèna. Ò de péè péé-nà yèdi n̄t̄í-dà, kà Weèdi tontòndipá púsí toná o kpémú.

Sèsî yí numbíiménápa p̄anàhì è yò p'òò t̄una

¹⁴ Kà pá c̄j̄t̄ Ìsá-Bàtìsì òò ȳj̄i kódedí, ye kú dàhàka kà Sèsî é yí é tadí Kàd̄id̄éè tempáaku meheká é t̄èi è cakú Weèdi wenaamá. ¹⁵ Ò de pà cakú è toò: Wòni-dà t̄èi, kà Weèdi wòòti hétà-ní. Cehèna-nà fòumu é t̄anta Weèdi wenaamá!

¹⁶ Daadí yèni, kà Sèsî é n't̄un Kàd̄id̄éè baadi n̄udi, é déhá S̄im̄s̄ò n'òò kúcàa Ànt̄id̄éè kà pà k̄amù k̄ánc̄ĩmu ye baadi meheká, è ȳáá pà de yòn numbíiménápa-dà. ¹⁷ Kà Sèsî é pà caka è yò: N t̄unà-nà-ní ká n héé kà né m'penti nìpa kà pá nà n t̄un. ¹⁸ Ye pesá n'èe pesá, kà pá héé-ho pa k̄ánc̄ĩmná òò t̄una.

¹⁹ K'ó tuùta-ho yìhìka c̄emasí, é déhá Sàákì Sèbèd̄éè bíítá nà ta ȳanta Ìsáà, kà pà m̄e té péé h̄àp̄u meheká è d̄òhu pa k̄ánc̄ĩmná. ²⁰ Ye pesá n'èe pesá, k'ó pà yí, kà p'òò t̄una, é héé-ho pa báaa Sèbèd̄éè n'òò dehèpa h̄àp̄u meheká.

Sèsî kpekanà n̄ido weèko f̄ákápú-ko

a 1:1 Ye yèdi kp̄èi é n'yò Weèdi t̄akad̄áko-dà. T̄umá dentá Mád̄íkì 8:29 nà Mád̄íkì 14:61-62.

²¹ Sèsî n'ò dapàmma, kà pá taá Kàpènáúm yotí. Damuhipàdi daadí, k'ó taá Weèdi wemá bihà-nàmòni meheká é tèi è bihànì Weèdi wemá. ²² K'yé dii nìpa n'ò de bihànì-ma kú bookú, mì tee-sá o kú bihànámá de pú yònà Weèdi kpéntìnùka bihànápá kpéemá, ò de pà bihànì nà kpénti nòti-dà.

²³ È hótà ye Weèdi wemá bihà-nàmòni meheká, dòò òcòn yè péé kà weèko péé o meheká. K'ó kpákada-ní è yò: ²⁴ Héi! Sèsî Nàsàdétì kóóó, a ti kpèi-nà badà? A tènì è kó ti sehèna-á-ma? N yáá-ma sukú è yò a yòn nìwenikó-dà Weèdi tòn-kó-ní.

²⁵ Kà Sèsî é weé-nà kpeéma ye weèko è yò: Kpíí ye pesà! Yèè ye dòò menè kú mehekà! ²⁶ K'ó sàmpà kpeéma ye dòò, é hoda sàma é yèdi o meheká. ²⁷ K'yé dii nìpa mèm̀pà de péé-pa weñni ye pesá, kà pà yò békú pa tòpa è tonà: Paáma m̀m̀óma-dà memà-ní? Déhá-nà nido k'ò kònì bihànámá càm̀ma nà kpénti nòti. Ò múntà kònì weèkupá-dà nùdi nà nòti kà pà t'òd yèkà-nà todí. ²⁸ Ye pesá n'èe pesá, k'ò yèdi é cemá pidá Kàdìdèè tempàaku weñni meheká.

Sèsî kpekanà m̀kàpa d̀ódi

²⁹ Pà yèni t́n wòni Weèdi wemá bihà-nàmòni meheká, kà Sèsî é tadí Sím̀ò nà Àntidèè h̀òta è nò-nà Sàákì nà Ísáà. ³⁰ Sím̀ò pòò màa-dà há de d̀ó è m̀n méti. Sèsî tènì-má-ní, kà pá cemá óò caka o d̀nkú kpémú. ³¹ K'ó taá ò d̀ó-sa é tèi é cèè o nòku óò yíkàna-ní. Ye pesá n'èe pesá, k'yèè wòntònti é yò, k'ó yí pà peha dipú kà pá dii.

³² Weèdi d̀ò t́n wòni, kà damuhipàdi é yò, k'yé biikà, kà nìpa é toha-ní o pesá m̀kàpa weñni, nà weèkupá de péé-pa kú meheká. ³³ Kà yotí nìku weñni é peeta ye h̀òta tapaadi. ³⁴ K'ó kpekàna nìpa d̀ódi d̀ncí ci bodú bodú, é yídá b̀hà weèkupá d̀ódi nìpa meheká. Ò de pú h̀ teha kà weèkupá wedá, mì tee-sá pà de yáá-ma m̀n dèè-ko.

Sèsî cènti Kàdìdèè tempàaku meheká è cakú Weèdi wenaamá

³⁵ Kányè̀nfa pìpidì, k'yè káà b̀nì, kà Sèsî yí é yèdi é taá bèmbèni nìpa pú péé-di, é tèi è d̀n Weèdi. ³⁶ Sím̀ò nà mèm̀pà de ò nò-nà-pa, kà pá yí é taá o pehapu. ³⁷ P'òd déhá t́n wòni, óò caka è yò: Nìpa weñni a penti. ³⁸ K'ó pà t́nà è yò: Tí kahá-nà béékú t̀kú, yòbícì m̀ncì t́-t̀sì-ci mì. Yè békú n m̀e té tèi é cì caka-á-ma Weèdi wenaamá, è yáá ye kú kpémú-dà tee ká n tènì. ³⁹ K'ó yídá é taá Kàdìdèè tempàaku weñni meheká, é tèi é dúú Weèdi wemá bihà-nàm̀ka meheká, è cakú Weèdi wenaamá, è b̀hu-nà weèkupá.

Sèsî kpekàna k̀n

⁴⁰ Kà k̀n òcòn é tantá-ní Sèsî pesá, é tènì é h̀u-ho o yìhika òò séúkú è tonà: K'à kpèi, a kó neé n kpekàna-á-ma, ká n weka. ⁴¹ Kà séema é cèè Sèsî, k'ó deèda o nòku óò ṕn è yò: N kpèi-í-ma, kpeka! ⁴² Ye pesá n'èe pesá, k'ò k̀nku é yò k'ó weka. ⁴³ Ye wòni, kà Sèsî òò weé-nà kpeéma óò caka è yò: Tòta é kahá. ⁴⁴ A dá yetá mà ca-caka òcòn. Àmá, á taá é beka a c̀ddi d̀hàdi yañn, é paá wekànamá d̀hàdi, M̀yìsì kpéntìnùdi h̀n á paá-di, é beka nìpa weñni è yò a kpekáà^b.

b 1.44 Pàc̀ tonà ye wenòdi kpèi é n'yò: Ye kú paámá kó pà beka m̀m̀ yòn-ko-dà.

⁴⁵ Àmá, k'yèe nìi kàhá, é taá é bekaná páàti weñni mìì ò pàà-sa-ní, k'yé n'tee-nà kà Sèsî koò pú n'neè é dúú yotí ticòtì kú meheká, kà nìi yáá. Ò de h̄y m'péé bèmbèka nìpa kóó-ka-dà, kà pà yèhu-ní páàti weñni è kódi-ní o pesá.

2

Sèsî kpekàna hùta

¹ K'yé h̄in daàka céma, kà Sèsî é tóní Kàpèènaúm yotí. Kà nìpa é yekà è yò ò péé h̄yta meheká. ² Kà nìku dóódi é peeta ye h̄yta meheká, kà bòdi é dóntá é yó péé-nà-h̄y tapàadi, k'ò pà cakú Weèdi wemá. ³ K'ó pà n'cakú Weèdi wemá, kà nìpa pàcòpà é tènì o pesá, pa meheká kà nìi pànàhì toó-ní hùta. ⁴ Kà pá tènì é n'h̄yta pà pú kó neé tà t̄ahina o pesá nà nìku dóódi kpémú. Kà pá dìsi nàmòh̄fiùwadí h̄ínka, ò de péé-di kú meheká, é beé-nà ò péé-sa móm-mónyá, é wíkádá bòdi. N'èe bòdi, kà pá cùhina-h̄y ye hùta, kà tà dòó ta dòódi h̄ínka. ⁵ Ò h̄yta-ma mèm̄pà tà toó-pa-ní káá-dà dandanní, k'ó cemá caka ye hùta è yò: N bidà, a s̄ìma dedà-á-dà.

⁶ È h̄yta Weèdi kpéñtinùka bihànapá pàcò kaadi ye pesá, kà pá cemá mahà pa yàma meheká è yò: ⁷ Yè cèhkaà k'ó wedá mema kú bookú? Ò tèu Weèdi-dà. Weèdi còódi bààsí, wodà kó neé é deèda nido s̄ìma? ⁸ Ye wòni n'èe wòni, k'ò sèdi é cem'òó caka pà màhu-sá pa yàma meheká. K'ó pà béka è yò: Badà tee kà ne káá ye kú yaàmàhàkà kú bookù-ní ne yàma meheká? ⁹ Mmónyá-dà dòn-nà ye tòósa: M'a n'yò-ma m'a dedà a s̄ìma, nà m'a h̄in-má yídá é tódá a dòódi é cèn? ¹⁰ N kpèi né n'yáá-ma è yò mmí Niifòuo bíitá n káá-ma nòti è kó neé deèda nido s̄ìma tenkà h̄ínka. ¹¹ Ye wòni k'ó caka ye hùta è yò: Yídá é tódá a dòódi é kòn, mmí-dà mà n'àà h̄in!

¹² K'ó cemá é yíi-ní ye wòni n'èe wòni é tódá o dòódi é yèdi nìpa weñni yìhika. K'yé pà dii pa weñni, kà pà dùnti Weèdi è tonà: Ti mum pú déhà pàámà memà kú tòóma daadí yèni!

Sèsî yíi Dèfí è yò óò tùna

¹³ Kà Sèsî é tón Kàdìdèè baadi nùdi béka, kà nìku dóódi tēhu-ní o pesá k'ò kù bihàni. ¹⁴ K'ó n'k̄ghedi é déhá Dèfí, Àdìfèè bíitá k'ò kàdi o kaàcáhà-tómú pesá. K'òó caka è yò: N tuùna-ní! Kà Dèfí é yídá óò tùna.

¹⁵ Ye kú dàhàka, kà Sèsî n'òò dapàm̄ma é taá Dèfí h̄yta, é tēi é péé è yon-nà kaàcáhàpa nà niis̄m̄ma tòópa dóódi, mìì tee-sá ye kú nìpà bookù de s̄ún-í-ma òò tùn. ¹⁶ Kà Weèdi kpéñtinùka bihànapá yè péé è yòn Fàdísìpa kpéepá. Pà déhà-ma k'ò yon-nà ye kú nìpà wenni-ní, kà pá béka o dapàm̄ma è yò: Badà tee k'ò péé yon-nà kaàcáhàpa nà niis̄m̄ma? ¹⁷ Kà Sèsî é mà yekà é pà caka è yò: Nìpa mèm̄pà kpeni-pa pú penti dòkòtòdo, mèm̄pà m̄on-pá-dà h̄yò m'penti. N pú tènì è kó yíi niicoópa, àmá n tènì è kó yíi niis̄m̄ma-dà è yò pá n tuùna.

Sèsî cakú-sa numboóma híńka

¹⁸ Daadí yèni, kà Ìsá-Bàtìsì dapàmma nà Fàdìsìpa boú nùdi. Ye wòni, kà nìpa pàcɔpà é tɛni é béka Sèsî è yò: Badà tee kà Ìsá-Bàtìsì dapàmma nà Fàdìsìpa kpéepá boonì nùdi k'aa kpéepá há pú boonì? ¹⁹ Kà Sèsî é pà tɛná è yò: Ne maàhu è tonà pà yíi-pa-ní potóoma kó neé-dà é bowá nùdi k'yèe podɔɔ káa pà péé-nà? Pà pú kó nedá. Ò káa pà péé-nà tɛn wòni, pà pú kó neé héé dipú è pú n'dii. ²⁰ Ámá, wòni pení-ma-ní kà pà kó tódá podɔɔ óò kahàna. Ye kú daadí, pà kó bowá-ma nùdi.

²¹ Òcɔn pú hɔ tódá báapàńku pètàda é taá pɔná báakpɛńkú. Kà nìi mà hɛn, ye báapàńkù pètàdà kó dɔhà é cétá-ma ye báakpɛńkù, kà ku bòdi é dɔhà é pekà. ²² Òcɔn mɛe pú hɔ cɔdí dìfɛɛ pànn dɔcí yúukpɛńka meheká. Kà nìi hɛn mɛma, ye dìfɛɛ kó kà pódá-ma é sɛn n'ɛe yúuka. Ámá, pà hɔ cɔdí dìfɛɛ pànn yúupàka meheká-dà.

Sèsî yòn damuhipàdi kpènn

²³ Damuhipàdi nìcɔnì, kà Sèsî é n'kahù pɛɛ yòka yońna nàcɔnà è nɔɔ-n'òo dapàmma. Pà nà dèeku-má, k'òo dapàmma kađi pɛɛ yoófáati còku béékú. ²⁴ Kà Fàdìsìpa é caka Sèsî è yò: Wántá a dapàmma pakú-se-è! Badà tee kà pà pakú kpéńtìnùka yeéè-sa damuhipàdi daadí °?

²⁵ Kà Sèsî é pà tɛná è yò: Ne mum pú kaàn-kaàn daadí yèni kòni de cɛɛ Dàfítì n'òo nìpa k'ó hɛmpú kà pà mɔńkàa pà kó dii-sá? ²⁶ Ò de tɛi é dúú Weèdi hɔɔta meheká-dà é tódá pɛɛpa pà kɔɔ-pa Weèdi é cécí. Ye kú wòni, kà Àbìàtàà-dà yòn dɔhàka yańma kpènn^d. Ti Weèdi kpéńtìnùka há hɛn dɔhàka yańma cɔɔdi-dà yònà é cécí ye kú pɛɛpà-ní. K'ò de é pà cécí, é paɔ-nà o nìpa.

²⁷ K'ó tɔhèna è yò: Weèdi hɛnà damuhipàdi nìdo kpémú-dà, nì pú paɔ nìdo damuhipàdi kpémú.

²⁸ Mɛmá-dà tee mmí Nìifòuo bíítá, n yòn-ma bá damuhipàdi kpènn.

3

Sèsî kpekàna nìdo k'òo nòku faá

¹ Daadí tɔɔdi, kà Sèsî é tɛmá tón Weèdi wemá biɔhà-nàmòni meheká, é tɛi è hɔtá dɔɔo òcɔn yè péé k'òo nòku faá. ² Mèmpà de péé-pa ye Weèdi wemá biɔhà-nàmòni meheká, kà p'òo còti dédéi é kó déhá k'òo kó kpekàna ye dɔɔo damuhipàdi daadí, mìi tee-sá pà de pehènta o yetádi-dà è k'òo púá. ³ K'ó caka ye dɔɔo mènń kú nòku de faá-ko è yò: Yídá é neèhi mìi nìku weńni yìhika!

⁴ Ye wòni, k'ó béka mèmpà de ò wán-pa è yò: Damuhipàdi daadí, ti kpéńtìnùka ti pɛi-í-dà nùdi è yò ti té paá suumá n'kéè sɛmà? Kà hɛn tí fɛhina nìdo n'kéè t'òo kòu? Kà pà baà yòn wám.

⁵ K'ó pà wántá pa weńni nà fɔɔdi, k'òo yàma cɔha dédéi nà pà de kpekàna-ma touka è pú kpèi é yeká yècɛi. Ye wòni, k'ó caka ye dɔɔo è yò: Cańna a nòku! K'ó kú cána, kà kú tón ku yònti. ⁶ Kà Fàdìsìpa é cemá é yèdì ye wòni n'ɛe wòni ye Weèdi wemá biɔhà-nàmòni meheká, é peèta-nà Hèdótì kú nìpa, kà pà kó déhá pà kó hɛmpú óò kòu.

c 2:24 Sùwífupa pesá nìi pú yònà é paá tɔmú mùcɔmù pa damuhipàdi daadí. Pa pesá mèekà é kaťa pɛɛ yońfáaku de yòn tɔmú-dà. Nte mìi de tee-sa kà pà wei mɛma.

d 2:26 Dentá-nà 1Sam 21:1-6

Niku dódì tēni Sèsî pesá

⁷ Kà Sèsî é kàhá n'ò dapàmma Kàdìdèè baàdi nùdi, kà niku dódì òò tūna. Kù de yeèni-nà-ní Kàdìdèè tempáaku-dà, nà Sùdèè kpékú, ⁸ nà Sèdisàdém, nà Ìdùmèè, nà yotí mènìti kpédí-ti Sùtèè kónnùdi tòdi, nà Tîi nà Sitjù yotí béécí béécí kpéepá. Ye kú niku dódì-dà de tēni Sèsî pesá, mìi tee-sá kù de yeèkaà ò pakú-sa weñni-dà. ⁹ Ye wòni, k'ó caka o dapàmma è yò p'òò dònà hàpu mùcú k'yé teha kà niku dá ò nònà. ¹⁰ Ò há de kpekàni-ma nipa dódì tá, memá-dà kà mèmpa kú wenni de kòn-nà-pa dancí məkù è kpèi òò pín. ¹¹ Weèkupá de péé-pa kú meheká weñni de hù ò déhá-ma, è té dodi-ho o yihika é kpákada è yò: A yòn Weèdi bíitá-dà. ¹² Àmá, k'ò té pà wédí-nà kpeéma è yò pà dá caka menn héé-ko.

Sèsî bàtà o tontondipá pî-pàdèé

¹³ Ye kú dàhàka, kà Sèsî é disì tǎdi hínka é tēi é yíi nipa ò kpèi é yíi-pá, kà pà tēni o pesá. ¹⁴ Pa meheká, k'ó bàtà nipa pî-pàdèé [é pà yíi o tontondipá]. Ò de pà bàtà è kpèi pá péé òò m'péé-nà-á-ma, k'ó pà n'tòn kà pà cakú Weèdi wenaamá, ¹⁵ é pà kǎ nòti kà pá m'òòhu weèkupá. ¹⁶ Nte ye tontondipá pî-pàdèé ò de batà-pa: Simóò, ò de tǔmà cetà-ko Píyéè, ¹⁷ Sààki n'òò kúcàa Ìsǎà, pa déèdi kà pà yòn Sèbedèè bíhí. K'ó pà pǎ yèdi è yò: Bònèsèsi, mìi kpèi é yò-sa nipa kà pà yònà tawóhadi, ¹⁸ nà Àntìdèè nà Fídípù nà Bàtèdèmî nà Mátíyèè nà Tòmáa nà Sààki, Àdifèè bíitá nà Tàdèè nà Simóò mènì yení-ko o yotí kpémú, ¹⁹ nà Sùdási Ìsikàdìyótì mènì kó yó yeè-kó Sèsî.

Sèsî hǎtà kpéepá kpèi òò tódá òò nátá-nà niku

²⁰ Ye kú dàhàka, k'ó tón é koní hǎtà n'òò dapàmma, kà niku dódì é tǔmá peeta, kà pá mónka bòdi bá pà kó dii-má. ²¹ K'òò hǎtà kpéepá é mà yèkà é tēni o tódápu, mìi tee-sá pà de tonà ò fikadà-á-ma.

Sèsî tēni mèm'òò pǔyini-pa

²² Weèdi kpéntinùka bihànapá mèm'òò de yíi-pa-ní nà Sèdisàdém é tēni o pesá, kà pà wei è tonà: Weèkupá wódo Bèdisèbúdí-dà péé o meheká, menn-dà mèè ò kǎni nòti k'òò bòhu weèkupá nipa meheká.

²³ Kà Sèsî é pà yíi-ní é pà weé-nà webemù yohènamà memà, k'òò yò: Nté Weèkupá wódo kó himà é bǎhà o cǎdi? ²⁴ Kà wóteñka kàcǎkà kú nipa kǎnti-nà pa tǎpa, ye kú wóteñka pú kó n'fòu.

²⁵ Kà hǎtà tǎcǎtà kú nipa mèè kǎnti-nà pa tǎpa, ye kú hǎtà pú kó n'fòu. ²⁶ Kà Weèkupá wódo kǎnti-n'òò cǎdi, k'òò wóteñka totà, o wóoti pú kó n'kadí, tì kó neèhi-í-ma.

²⁷ Òcǎn pú kó neé dúú niikpedo hǎtà é kodá o káma weñni è pú n'cedí denà òò cǎé òò dákáná. Àmá, k'òò dákánà è yòò, ò kó neé-ma é kodá mìi péé-sa weñni o hǎtà meheká.

²⁸ Mómá-dà n ne cakú-ma: Nipa kó pǎá-ma weñni sǎima, nà cǎka pà kó teunà-ka weñni Weèdi, nì kó neé pà dèda-á-ma ye kú sǎima. ²⁹ Àmá, nido mènì kó tē-kó Seèwendí, Weèdi pú k'òò dèda ye kú sǎimà-ní daadí yèni, mà baà kó m'péé o yudí hínka-dà k'yé n'kǎ yòomá.

e 3.16 Ye yèdi kpèi é n'yò tǎdi-dà.

f 3:22 Dentá-nà Dùúkì 11:15

³⁰ Sèsî de pà wèè-nà mema, mì tee-sá pà de yò wèèko-dà péé o meheká.

Mèmpà yòn-pa Sèsî màa n'òo yanhí

³¹ Ye wòni, kà Sèsî màa n'òo yanhí é tènì é neèhi tapaadi é tòn nido è yò óò yíí-ní. ³² È hṣṣà niku dṣṣdi kaadi òò yéntà. Kà p'òò caka è yò: A màa n'aa yanhí péé tapaadi àà penti. ³³ K'ó pà téná è yò: Wodà héé n màa, mómópa-dà héé n yanhí? ³⁴ K'ó wántá mèmpà kàdi-pá òò yéntà, è yò: Nte n màa nà n yanhí. ³⁵ Kà nido pakú Weèdi dṣṣí-sa, ye yañn-dà yòn n potṣṣò, nà n yañta, nà n màa.

4

Dibòòti yahípu Wèbemú yohènamá

¹ Kà Sèsî é tṣṣmá cetá è biḥàni Kàdìdèè baadi bèni. Kà niku dṣṣdi é peèta kòu háá k'ó dṣṣi hàṣṣpu hṣṣnka é kaadi, kà mù péé ye baadi meheká, kà niku menku péé teñka néemá nudi. ² K'ó pà biḥàna niyaṣ dṣṣdi nà wèbemú yohènamá. Ò de pà cakú o biḥànamá meheká, è tonà: ³ Besí-nà é yekà (sukú)! Dṣṣò òcṣṣn-dà de taá o yèdi dibòòti yahípu. ⁴ K'ó tèi é tì n'yahù, kà bíimá màcṣṣ dṣṣdi còku béékú, kà nèhi é tènì é mà dii fé. ⁵ Kà tṣṣma dṣṣdi teñka mènka káa-ka tṣṣaṣka è pú cṣṣpu bá cṣṣma. Kà má yeèni ye wòni n'èe wòni mì tee-sá ye teñka de pú cṣṣpu. ⁶ Kà wèñku é náá-ní é mà tòn, kà má kpe-kpeí mì tee-sá ma cṣṣnci de pú cútà. ⁷ Kà bíimá tṣṣma dṣṣdi poòma cṣṣhàka. K'yèe poòma é kpṣṣn é mà fṣṣn, bá mà pú pedà yècṣṣ. ⁸ Àmá, kà tṣṣma é dṣṣdi tenyuhùka hṣṣnka, é yèdi é kpṣṣn dédéí é pedá bíimá. Kà màcṣṣ é pedá bíimá pútaṣ, tṣṣma bíimá púkoṣ, tṣṣma bíimá kṣṣta.

⁹ Kà Sèsî é tḥèna è yò: Kà mènṣṣ káa-ko toòka è kó yekà, k'ó yekà.

Mì tee-sá kà Sèsî wèi-nà nìpa wèbemú yohènamá

¹⁰ Sèsî nàtá-nà tṣṣn wòni niku, k'òo tontondipá pṣṣi-pàdèé nà mèmpà de péé-pa o pesá óò béka è yò ó pà wekàna ye wèbemú yohènamá. ¹¹ K'ó pà téná è yò: Weèdi-dà ne pṣṣi néna è yò né yáda ni wòòti kpéésá mì de sṣṣ-sá. Àmá, nìpa tṣṣpa mempa, pà you niyaṣ weñni nà wèbemú yohènamá cṣṣdi-dà,

¹² k'yé teha kà pá n'wañ p'áá bá déhá,

é n'you p'áá bá yekà yècṣṣ,

kà pà dá yetá é kṣṣ pa cṣṣdi Weèdi kà ní pà dèda pa sṣṣma^g.

Sèsî wekanì dibòòti yahípu wèbemú yohènamá

¹³ K'ó pà béka è yò: Ne pú yeèkaà ye wèbemú yohènamá kpèi é n'yòp'aa? Ntè n'aa kó hṣṣmà é yekà wèbemú yohènamá tṣṣma weñni? ¹⁴ Ye diyahíkò-ní, ò yahù Weèdi wemá-dà. ¹⁵ Nìpa pàcṣṣ yònà còku béékú dibòòti dṣṣ-kú kú hṣṣnka-dà, è té yekà Weèdi wemá kà Weèkupá wódo té cemá tènì é mà dèda pa yàma meheká. ¹⁶ Kà tṣṣpa yònà tṣṣaṣka teñka dibòòti dṣṣ-ká kú hṣṣnka, è té yekà Weèdi wemá é mà teha ye wòni n'èe wòni nà yañnaakú. ¹⁷ Àmá, pà pú kó hédá kà má kaadi pa meheká. Pà hṣṣ mà tṣṣnta wòni cṣṣmasí meheká-dà, kà náñkú wòni tènì yoo kà pà pà yañti nà Weèdi wemá kpémú, kà pà té cemá é búta Weèdi. ¹⁸ Kà tṣṣpa yònà poòti teñka dibòòti dṣṣ-ká kú

meheká, è té yekà Weèdi wemá, ¹⁹ àmá, kà fòuku yaṁmàhàka, nà káma bándàfa, nà bìno cɔnàma tɔ̀sa tɔ̀sa hĩ̀nka, té dúú pa yàma meheká é mà fĩntá, mà koò bá neé peṅta pa fòumu. ²⁰ Tɔ̀pa mempa yònà tenyuhũka dibò̀ti dɔ̀-ká kú hĩ̀nka-dà, è té yekà Weèdi wemá é mà tànta, kà má pedá suusá pa yàma meheká, é n'yònà bíimá pa bɔ̀-ma hɔ̀ pekamá bíimá: Mácɔ̀ pútaa, tɔ̀ma púkɔ̀di é yídá tɔ̀ma kɔ̀ta.

Webemú yohènamá nà hawèta

²¹ Kà Sèsĩ tũmá pa caka è yò: Pà hɔ̀ tɔ̀n-ń-ma hawèta é taá tà taa yúúdi meheká-a, yoo é taá tà hĩ̀ná dɔ̀dídí fɔ̀di-a? Pà pú hɔ̀ taá tà cɔ̀ná cɔ̀ncɔ̀ni hĩ̀nka-à? ²² Mìi kú wenni sɔ̀-śá, pa kó wántá èè fohina-á-ma. Nĩpa mèe pú yáá-sa weñni sáma-ńí, pa kó wántá èè dèna-á-ma-ńí wenikú meheká. ²³ Kà mènè káa-ko toòka è kó yekà k'ó yekà.

²⁴ K'ó tũmá pa caka è yò: Paá-nà yɔ̀kama ne yeeku-sá hĩ̀nka. Wañni ne beé-nà-di é paá tɔ̀pa, Weèdi kó wántá beé-nà mení-dà é ne paá, é tɔ̀hèna-nà, ²⁵ è yáá, mènè káa-ko yècɔ̀, pa k'óò tɔ̀hèna-á-ma k'ó d̀hà é kádá. Mènè mèe kɔ̀-ko yècɔ̀, pa kó feèda-á-ma bá ye cẽmasí ò màhu è tonà ò káa-sa.

Webemú yohènamá nà dibò̀ti mèniti yèè-ti ti cɔ̀di

²⁶ Kà Sèsĩ tũmá yò: Weèdi wò̀ti teṅka yònà nido hɔ̀ bɔ̀-ma-dà dibò̀ti o yèdi meheká. ²⁷ Kà yèṅka té bóka k'ó kòn é tèi é dɔ̀, k'yé weka k'ò té heṅta, ye wòni kà dibò̀ti yeèhu, è kpéñ, ò pú yáá ti hɔ̀mpú. ²⁸ Teṅka mɔ̀nká-dà hɔ̀ deèna-ńí yoṁpɔ̀ɔ̀ci é ci kpéñkàna, kà cí pón é pukàda, é pedá bíimá kà má bii. ²⁹ Bíimá bii tĩn daadí, k'ó tèni é kɔ̀u o dití, mìi tee-sá dikɔ̀umá wòni-dà tèi.

Webemú yohènamá nà kùnsòpu bíifá

³⁰ Kà Sèsĩ tũmá yò: M̀mɔ̀nyá-dà ti kó neé yohèna-nà-ma Weèdi wò̀ti? Nà webemú yohènamá m̀mɔ̀nyá-dà ti kó weé-ma ti wemá? ³¹ Tì yònà kùnsòpu bíifá-dà, pa hɔ̀ fà m'boò tĩn wòni teṅka, kà fà yòn sìmmɔ̀nfá-dà tebííci weñni meheká. ³² Àmá kà pa fà bɔ̀dí è yò, kà fà yèni kà fà té kpéñ é hĩn tesàpu é haṅá-nà tená tɔ̀na. Mù hɔ̀ yèè dèecí sàci m̀ncí-dà kà nèhi té tèni é yèná mu hĩ̀nka.

³³ Nà ye kú webemú yohènamá memá kú bookú dɔ̀dídí-dà ò de pa cakú-ma Weèdi wemá, è behú-nà pa yekàma sápu. ³⁴ Ò de pú hɔ̀ pa weé-nà kà webemú yohènamá kɔ̀. Àmá, kà pa péé tĩn wòni pa cɔ̀di mení n'ò dapàmma, k'ò té mà pa wekàna ma weñni pái.

Sèsĩ nèhina yakùkùdi

³⁵ Ye daadí ni cɔ̀di kú yohokú, kà Sèsĩ é caka o dapàmma è yò: Yàà tí deeta-nà baàsàdi sòidi tɔ̀di. ³⁶ Kà pá hédá niku, k'òo dapàmma óò tódá nà hààpu ò de péé-pu kú meheká kà pá kahá, kà hààna tɔ̀na pa nò-nà. ³⁷ Pà t̀di-ma, kà yakpeeku é kpetá-ńí, kà néesanhi podi è húdi-ho néemá ye hààpu meheká, háá kà mù kódí súnápu. ³⁸ È hɔ̀tá Sèsĩ menn péé dàhàka è dɔ̀ è cesí o yudí yucekadádi. K'òo dapàmma óò hènna è yò: Ti dakpéñ, a pú dii ti kó kpí-mà? Yè p'áa káa kɔ̀kapàma màcɔ̀mà nkèè? ³⁹ K'ó heṅta-ńí, é weé-nà kpeema ye yakú, é caka ye baadi néemá è yò: Hĩn wámu! Neèhi mema! K'yèè yakú é neèhi, ye weñni k'yè yò cèu. ⁴⁰ Ye wòni, k'ó pa béka è yò:

Badà tee kà ne wani mema? Ne mum pú káá dandan'áa? ⁴¹ K'yé pà hìn-nà wantafɔ̃di sàdi, kà pà békú pa tɔ̃pa è tonà: Nii wodà memà, k'ò té wéé-nà yakú nà néemá k'yé ò yèkà-nà toodí?

5

Sèsî kpekàná dɔ̀ɔ wèèkupá fákápú-ko

¹ Kà pá deèta ye baàdi sóidi tɔ̀ɔdi, é tantá Sèdàsáapa^h teñka meheká. ² Kà Sèsî n'cúti-ní hààpu híñka, kà dɔ̀ɔ òcɔ̀n é cemá yeèni híùka meheká, é tèni o peètanàpu kà wèèkupá péé o meheká. ³ Ye dɔ̀ɔ de wentí híùka meheká-dà. Òcɔ̀n de koò pú kó neé óò dákáná bá nà dákáti. ⁴ Pà de hɔ̀ dákáná máàka-dà o tàka, é bowá dákáti o nòhi, àmá k'ò té tɔ̀ɔta ye dákáti, é céda ye máàka. Òcɔ̀n de koò kɔ̀sɔ̀ nɔ̀ti è kó neé óò nèhina yɔ̀kàma. ⁵ Ò de hɔ̀ m'péé wòka weñni, yèñka nà wèñku, híùka meheká-dà, nà tɔ̀ɔka híñka, è té n'toó hodí, è pakàta o cɔ̀ɔdi bòka nà tɔ̀ɔka.

⁶ K'ò déhá Sèsî nà deùma, é cocí-ní é tèni é hiu-ho o yìhika, ⁷ é wedá kpeéma è yò: Sèsî, Sàwèñku bidà, a n kpèi-nà badà? M'a séúkú-ma nà Weèdi yèdi, dá n diá náíká.

⁸ Ò de wei mema, mìi tee-sá Sèsî-dà de kɔ̀ni nùdi ye wèèkupá è tonà: Yèè-nà dɔ̀ɔ menè kú meheká, wèèkupá néna!

⁹ Kà Sèsî óò béka è yò: A yèdi héé ba? K'òò tɔ̀nà è yò: N yèdi-dà Dóódi mìi tee-sá ti yòn dóódi-dà.

¹⁰ Kà wèèkupá é yèi ye dɔ̀ɔ k'ò kpehikà sukú mónkú Sèsî è yò ò dá teha é pà dèna yɔ̀ti mentí kú meheká.

¹¹ Yè há de hɔ̀tà fankàdóódi nìcɔ̀ni-dà péé ye pesá, è càu tɔ̀ɔdi híñka è penti dimá. ¹² K'yèè wèèkupá é séuka Sèsî è yò: Ti hédá kà tí taá dúú fàñkàti mentí kú meheká.

¹³ K'ò pà caka è yò tɔ̀ɔta-nà. Ye wòni, k'yèè wèèkupá é yèdi ye dɔ̀ɔ meheká é taá dúú ye fàñkàti. K'yèè fankàdóódi weñni, kà nì yò tòhika kàdéé kpéemá, é dɔ̀tina-ní n'èe tɔ̀ɔdi híñka, é n'káá-ho n'èe baàdi meheká, é kpíí fé.

¹⁴ Mèmpà de cɔ̀nti-pá ye fàñkàti, kà pá cocí é dúú yɔ̀sàti nà yɔ̀sìmmònti mènti tì yéntà-ti é tèi é caka ye wemá. Kà nìpa é tèni é déhá mìi paà-sa. ¹⁵ Kà pá tantá-ní Sèsî pesá, é tèni é déhá ye dɔ̀ɔ wèèkupá dóódi de yèè-ko kú meheká k'ò kàdi, è báá báatí, k'òò yàma weni. Kà wantafɔ̃di é pà cɔ̀ɔ.

¹⁶ Mèmpà de péé-pa ye pesá é déhá mìi de paà-sa nà pa nònci, kà pá pà caka mìi de tèni-sá-ní ye dɔ̀ɔ wèèkupá de péé-ko kú meheká, nà ye fàñkàti. ¹⁷ Ye wòni, kà pá cemá séuka Sèsî è yò ó yèdi pa teñka.

¹⁸ K'ò n'dikidi hààpu híñka, k'yèè dɔ̀ɔ wèèkupá de yeè-ko kú meheká óò séuka è yò ó héé k'òò tùna. ¹⁹ K'ò yeda, óò caka è yò: Tón é kòn a hɔ̀ɔta, é tèi é caka a hɔ̀ɔta kpéepá Teó a paà-sa weñni, nà w'àà kɔ̀nkàama kú bookú séema.

²⁰ K'yèè nido é yíi deèda yɔ̀ti píta tempáaku meheká, é caka nìpa Sèsî paà-sa weñni o kpémú, k'yé pà dii pa weñni.

Podò òcɔ̀n kpekànamá nà Sàyidísi sepàmbíitá foukànamá

h 5:1 Sèdàsáá tenká pà kà yíi pòkàhi tɔ̀hí meheká è yò Kàdàdàà-dà.

²¹ Kà Sèsî é tóní ye baàdi sòidi tòdi nà hààpu. Kà nìku dójódi é tíká o pesá k'ò péé néemá nùdi.

²² Kà Weèdi wemá bihà-nàmòni kpènn òcòñ é tèni, kà p'òò toò Sàyidísi. K'ó tèni é déhá Sèsî, é dɔɔ-ho o tàka fɔdi, ²³ òò kpèhiku dédéí è tonà: N sepàmbíitá-dà m̀d̀d̀i-nà-ní kùmú. Wéé yaní é cɔnà a ǹhi ta h̀nka, k'yé teha kà tá kpeka é fòuda.

²⁴ Kà Sèsî óò t̀na kà pá kahá ka béka, kà nìku dójódi ò t̀n òò péènta o p̀ndicí weñni.

²⁵ Y'áa de h̀ta ye nìku meheká, poòo òcòñ-dà péé è m̀n poòma, è yòn beeká p̀i-kadéé mà pú ỳ. ²⁶ K'ó taá d̀k̀t̀oòpa dójódi pesá é dii nánkú sàma nà pa teepàma, é sehèna o dící weñni, yècèè pú t̀kàà, k'yé múntá d̀hà é petá-ní. ²⁷ Ò yèkaà-ma Sèsî wemá, k'ó tèni é f̀kapa ye nìku meheká, o dàkàbékàma, é p̀ín o tókédi, ²⁸ mì tee-sá ò de maàhu è tonà: Bá kà n neè p̀ín o báatí, n kó kpeka-á-ma. ²⁹ Ye pesá n'èe pesá, k'òo poòma é céúdá, k'ó bantá o ẁnku meheká è ỳ ò kpekáa-á-ma. ³⁰ Ye ẁni ni c̀j̀di meheká, kà Sèsî é bantá è ỳ nòti yedi o meheká. K'ó fitá-ní ye nìku c̀h̀ka é béka è ỳ: Wodà p̀ín n tókédi?

³¹ K'òo dapàmma óò t̀ná è ỳ: A mádí kà nìku aa p̀ni a p̀ndicí weñni k'áá t̀mà békú wod'áa p̀ín?

³² K'ó wántá wántá o p̀ndicí weñni è kó déhá m̀n h̀n-kó mema. ³³ Kà wantafɔdi é cèè ye poòo, k'ò cèùdi, mì tee-sá ò de yáá-ma mì paà-sa o ẁnku meheká. K'ó tèni é dɔɔ-ho o tàka fɔdi, òò caka webeèdi weñni. ³⁴ Kà Sèsî óò caka è ỳ: N sepàn, a dandaní-d'áa f̀hinà. Kahá nà wèèdi, a d̀nkú ỳ-ó-ma dédéí.

³⁵ Ò de káa wèi memá-dà, kà nìpa pàcòpà é teèní t̀nt̀nkú, è yèni-nà ye dapànkpènn Sàyidísi h̀j̀ta, é tèn'òò caka è ỳ: A sepàmbíitá koò pú kadí. A koò dá n's̀ncí è k̀kapú dakpènn.

³⁶ Kà Sèsî é mà yèkà, àmá ò pú mà kàn yècèè. K'ó caka ye dapànkpènn è ỳ: Dá n'wani, ní n'daí s̀ni! ³⁷ K'ó tódá Píyèè, nà Sàákí n'òò yañn Ìsàà s̀adi, kà p'òò béhina. Ò de pú teháa kà t̀o òcòñ óò t̀na. ³⁸ Kà pá tantá Sàyidísi h̀j̀ta, é t̀i k'ó n'h̀ta ta weñni yòn hodí-dà, kà nìpa toó kpíidawòka sàma k'yè yòn wèù. ³⁹ K'ó dúú-ho h̀j̀ta meheká, é t̀i é pà béka è ỳ: Badà tee kà ne toó ye kú hódikù n'èe kú dawòkà-ní? Ye bíitá pú kpíi-má, tà dɔɔ-dà-ma. ⁴⁰ Pà yèkaà-ma mema, kà pá púsí o dehípu. K'ò mèe pà dèna pa weñni. K'ó tódá bíitá báaa, nà ta màa, n'òò dapàmma mèm̀pà d'òò béhina-pa-ní, kà pá dúú ye sepàmbíitá de dɔɔ-sa. ⁴¹ K'ó t̀i é cèè ta ǹku, è ỳ: Tàdítá kùm! Mì kpèi é n'ỳ-ya: Yíi-ní sepàntà, mmí-dà mà n'áa h̀n!

⁴² Ye ẁni nà ye ẁni, k'yèe sepàmbíitá é yídá-ní, é púsí cèmu. Yè de h̀ta tà káa beeká p̀i-kadéé-dà. Pà déhá-ma mema, pa weñni k'yé pà dii sàma móma. ⁴³ K'ó pà caka è ỳ pà dá te-teha k'òòcòñ é mà yèkà. Ye kú dàhàka, k'ò ỳ pá tà paà dipú kà tá dii.

6

Nàsàdétì yàmma pú daí Sèsî wèi-sa kú h̀nka

¹ Kà Sèsî é yídá ye bèmbèni, é taá ỳtí ò de bíuháa-ti kú meheká, k'òo dapàmma óò béhina.

² Damuhipàdi daadí, k'ó dúú Weèdi wemá bihà-nàmòni meheká, é t̀i è bihànì. K'yé dii nìku dójódi m̀nkù d'òò besí-ku, kà kù tonà: Ò déta ya-ní ye kú yàmà-ní? Wod'òò p̀i ye kú yañfòumà memà-ní? Ò déta ya-dà ye kú nòti, è paquí-nà p̀ntápaámà memà kú wenni? ³ Ye nàmòp̀ínáko dɔ

miì-ì, Màdî bìitá? Menn pú héé Ìsákì nà Sòsési nà Sùúdi nà Sìmóò kúpùèya-a? O potɔ̀pa pú péè ti péé-nà miì-n'áa?

Mií-dà de tee kà pá yeda pà kó taàa-má dandaní o hínka. ⁴ K'ò mèe pà caka è yò: Pà hɔ̀ cuùu-ma Weèdi wetɛ́nàko páati weñni, àmá o yɔ́tí meheká, n'òo yem̄ma cɔ̀hòka, n'òo hɔ̀ɔ̀ta meheká, pà pú hɔ̀ ò kèda.

⁵ Ò de pú nèè é paá ye pesá pón̄tápaáma màcɔ̀mà, k'yè pú yònà mɔ̀kàpa cɛ́masí ò de cɔ̀nà-pa kú hínka o n̄hi é pà kpekàna. ⁶ K'yé ò dii dédéí n'òo yɔ́tí kpéepá de kóó-ma dandaní.

Sèsî tɔ̀n o tɔ̀ntɔ̀ndipá pîi-pàdèé pàdèé pàdèé

Ye kú dàhàka, k'ó yíi deèda yɔ̀bící mèn̄cì de tó-tósi-ci ye pesá, è biɔ̀hòni Weèdi wemá. ⁷ K'ó yíi y'oo tɔ̀ntɔ̀ndipá pîi-pàdèé é pà tɔ̀n pàdèé pàdèé, é pà kɔ̀ɔ̀ nòti è yò pá m'boðhu weèkupá. ⁸ K'ó pà kɔ̀ɔ̀ nùdi è yò: Kà ne kɛ̀hɛ̀di, ne dá n'toó yècɛ̀ɛ̀ ne cànku meheká, k'yé n'yònà dimá, pèheká yoo dící. Né n'toó ne yakú cɔ̀ɔ̀di. ⁹ Né fíi nèùti, n'òòcɔ̀n há dá n'toó tóhòka kàdèé.

¹⁰ K'ó túmá pà caka è yò: Kà ne tèi-sá weñni, kà nido ne codà o hɔ̀ɔ̀ta meheká, kà né m'péé menta, ne dá cehèna càn̄hɔ̀ɔ̀ta háá é n'sànà ne kó yíi-ma ye yɔ́tí é kahá páaku tɔ̀kú. ¹¹ Kà ne mèe tèi-tí yɔ́tí kà ti yàmma pú ne codà yoo è pú ne besí, kà ne tì yèti, kà né kpá-kpáda ne tàka tápùdumu, miì bekú-sa ti yàmma è yò pà paà-sa pú coó. ¹² K'yòo tɔ̀ntɔ̀ndipá é kahá, é tèi è cakú nipa è yò pá hédá pa paákpákpàama. ¹³ Pà de boðhu-ú-ma weèkupá dóódi, è tɛ̀kàta mɔ̀kàpa dóódi kòma è pà kpekàni.

Ìsá-Bàtísi kúmú

¹⁴ Kà wódo Hèdóti é yekà kà pà wei Sèsî wemá, miì tee-sá o yèdi de pità-á-ma páati weñni, kà pàcɔ̀ tonà: Ìsá-Bàtísi-dà yántà-ní kpíipa meheká, mií-dà tee k'ò káá nòti è pakú pón̄tápaáma.

¹⁵ Kà tɔ̀pa toò: Èdî-dà. Kà tɔ̀pa túmà toò: Weèdi wetɛ́nàko-dà, k'ò yònà dekáa wòni kpéepá p'òòcɔ̀n.

¹⁶ Hèdóti de yeèkaà-ma kà pà wei miì kú wenni o hínka, k'ò caka o cɔ̀ɔ̀di è yò: Ìsá-Bàtísi n héè kà pá fiita-kó kú yudí, dà yántà-ní kpíipa meheká.

¹⁷⁻¹⁸ Nte Ìsá-Bàtísi kúmú wemá ceñkaama. Hèdóti-dà de kádà Hèdòdiàti, k'ò yòn o kúcaà Fídípu poòo. Kà Ìsá-Bàtísi é caka Hèdóti è yò: A pú yònà é n'káá a kúcaà poòo. Memá-dà, kà Hèdóti mónn é kɔ̀ɔ̀ nùdi è yò p'òò cɛ̀ɛ̀, óò dákáná, óò yèi kódedí. ¹⁹ Kà Hèdòdiàti menn óò m'mɔ̀n-nà fɔ̀di, è penti è k'òò kò. Ò há de pú kó nedá, ²⁰ miì tee-sá Hèdóti d'òò wani-í-ma, è yáá è yò ò yòn *niìwenó-dà k'òò fòumu coó, k'ò yení o kpémú. K'ò de besí o wemá, mà de hɔ̀ kɔ̀kapa-á-ma o yàma, nà mema baàkaà, k'ò de naanà o besípu.

²¹ Hákà, kà daadí n̄cɔ̀ni é pedá, daadí pà de pedà-di Hèdóti, k'ò paá kúudi ye kpémú, é yíi o s̄n̄kàn̄ti, nà sòsipa kpém̄ma, nà Kàdìdèè tempáaku yɔ́tí kpém̄ma, dikàdikú. Kà Hèdòdiàti é cemá dètá ye pesà-ní paáma, ò kó dídí-nà-ma è kòò Ìsá-Bàtísi. ²² K'òo sepànn é dúú nipa de kaadi-sá, é tèi é haá, k'yé naaka dédéí Hèdóti n'òo càm̄ma ò de yíi-pa-ní. K'ò caka ye sepànn è yò: N còhà-ní a kpèi-sá, n k'èè n'áa paá-á-ma. ²³ K'ò wéha ye sepànn yihika è yò: A kó n còhà-sa weñni, n k'èè n'áa kɔ̀ɔ̀-²³ma, bá k'yè dósi k'yé n'yòn n wóoteñka yàhakú.

²⁴ K'yèe sepànn é yeèni é taá béka o màa è yò: Mmónya-dà n kó còhà-ma? K'òo màa óò téná è yò: Ní n'yò a kpèi Ìsá-Batìsì yudí.

²⁵ K'yèe sepànn yò àù, é tón feñ-feñma wódo pesá é tèi óò caka è yò: N kpèi á n kǔǔ-ní sánsákù Ìsá-Batìsì yudí kódaadí meheká. ²⁶ Kà wódo yàma é còha dédéí. Hákà, ò de koò pú kó neé ò yee-nà òò còhaa-sa, mìl tee-sá ò de yò wǎhàpu-dà o càmma yìhika. ²⁷ K'ó cemá tòn ye wòni n'èe wòni sósipa mèm̀pà d'òò ceí-pa p'òòcǔ, è yò ó taá fiita-ní Ìsá-Batìsì yudí é nì tɛ̀-ní. K'yèe sósó é kàhá, é tèi é fiita-ní o yudí kódedí meheká, ²⁸ é nì tàa-ní kódaadí meheká, é nì tɛ̀-ní é nì kǔǔ ye sepànn, k'ó taá nì kǔǔ o màa. ²⁹ Kà Ìsá-Batìsì dapàm̀ma é yekà o kúmú wemá, é tɛ̀ni óò tódá é taá ò dáná.

Sèsì dià nìpa tòhika kànùm̀

³⁰ Kà Sèsì tontòndipá é koní o pesá, é tèn'òò caka pà de paà-sa-ní nà pà de bihàna-sa. ³¹ K'ó pà caka è yò: Héé-nà kà tí taá bèmbèni nìpa kǔǔ-di, é tèi kà né muhipa céma. Ò de pà hìn mema, mìl tee-sá nìku dǔǔdi-dà de tudì-ní pa pesá kà tǔkú kùn, bá pà de pú káá bòdi è kó dii.

³² Kà pá dúú hààpu é kàhá bèmbèni nìpa kǔǔ-di, pà cǔǔdi pesá. ³³ Pà kǎhǎdi-má, kà nìku dǔǔdi é pà déhá, é bantá pà yòn-ka béka. Yotí weñni mèǹti de tó-tósi-ti ye pesá, kà nìku é yeèni, é cocí nà tàka, é pà hanci é tantá ye bèmbèni pà de kódi-di.

³⁴ Sèsì yèni tìn wòni ye hààpu meheká, é déhá nìku dǔǔdi, kà séema óò cǎdí dédéí ku hìnka mìl tee-sá kù de yònà hǎci mèǹci kǔǔ-ci-dà cǎnto. K'ó cemá cetá è pà bihani niya dǔǔdi hìnka. ³⁵ Y'áá de hǎtà wè̀nku-dà yò, ye wòni k'òo dapàm̀ma óò hétá-ho óò caka è yò: Wè̀nku koò pú kadí, nìl mèe kǔǔ bèmbèni menì kú hìnka. ³⁶ Wihina ye nìkù kà kú taá yèka hǔǔhí meheká, nà yóbíímú mèm̀mù tó-tósi-mu mìl é dontá kù kó dii-sá.

³⁷ Kà Sèsì é pà téná è yò: Ne mómpá é pà kǔǔ kà pá dii.

Kà p'òò béka è yò: A kpèi é n'yò tí tódá weñtúnká kò̀nà déé tòmú dífa-dà é taá é dontá-ní pǎ̀pa é tɛ̀ni é pà kǔǔ kà pá dii nkéè-è?

³⁸ K'ó pà téná è yò: Ne káá pǎ̀pa pàdɛ̀-à? Taá-nà é dentá! Kà pá taá é bé-béka, é tóní óò caka è yò: Pǎ̀pa pànùm̀-à péé nà numbíhí hidéé.

³⁹ K'ó pà caka è yò, pá kaàna nìku weñni hùhùuka hùhùuka, míbohítí hìnka. ⁴⁰ Kà nìpa kaadi hùhùuka hùhùuka, kàcǔ nìpa kòta kòta, tòka nìpa púnùm̀ nùm̀. ⁴¹ Kà Sèsì é tódá ye pǎ̀pa panùm̀ka n'èe numbíhí hidéèka, é wántá hìnka é seda Weèdi. K'ó wéha ye pǎ̀pa é pà kǔǔ o dapàm̀ma, kà pá pà totá nìpa. K'ó yí é tódá ye numbíhí hidéé é kǔǔ o dapàm̀ma, kà pá hì totá nìpa weñni. ⁴² Pa weñni kà pá dii, é den. ⁴³ K'òo dapàm̀ma é kodá pǎ̀pa nà numbíhí fiika mìl de sǔ̀ntà-sa, k'yé súná nám̀bòhi pî-hidéé. ⁴⁴ Mèm̀pà kú wenni de dii-pá ye dimá, daapá de yòn pa meheká tòhika kànùm̀-à.

Sèsì cèn néemá hìnka

⁴⁵ Ye kú dàhàka, kà Sèsì é cemá caka o dapàm̀ma è yò pá dúú hààpu meheká, é n'nihí é deeta ye baadi sóidi tò̀di Bètisàidáà béka, k'òo mónn ní n'wihinì nìku. ⁴⁶ Ò wihina-ma ye nìku é yò, é disì taàdi hìnka è kó paà weèdò̀pu. ⁴⁷ Kà yè̀nka é bóka, k'yèe hààpu sáá ye baadi còhàka, kà menn cǔǔdi kaá-ní teñka. ⁴⁸ K'ó déhá é n'hǎtà o dapàm̀ma m̀u-nà ye hààpu cemu, mìl tee-sá

yakú-dà de heu è pa coó-nà. Kà kóohí é n'kòh, k'ó yí taá pa béka, è cènti-ho ye baàdi néemá hínka, é tèi é n'kpèi é pà nènà¹. ⁴⁹ P'òò déhá-ma k'ò cènti néemá hínka, kà pá tóo dawòka è tonà bekebeèdi-dà. ⁵⁰ Pa weñni d'òò dii-í-ma, kà wantafḡdi pà káá dédéí. Ye wòni, k'ó cemá pà weé-nà è yò: Ne bḡti dá pùdi, mmí-dà, ne dá n'wani.

⁵¹ Ye wòni, k'ó dúú pa pesá ye hàḡpu meheká, k'yèe yakú é cḡyúdá. K'yé dii o dapàmma dédéí, ⁵² mìi tee-sá, pa yaḡmàhàdi-dà de káà kpedí, pà pú neè é bantá pónḡtapaḡma ò de paḡ-ma pḡḡpa hínka.

Sèsí kpekàna mḡkàpa Sènsàdétì tempáaku meheká

⁵³ Kà pá deeta ye baàdi, é tantá Sènsàdétì tempáaku, é tèi é píná pa hàḡpu kómḡbòni. ⁵⁴ Pà yèni-má-ní ye hàḡpu meheká, kà nìpa é cemá bantá Sèsí, ⁵⁵ é cokapa ye tempáaku weñni meheká, è tohú-ní pa mḡkàpa mēna hínka, è pà kódi-nà pà de hḡ yekà è yò ò péé-sa. ⁵⁶ Ò de hḡ taá-sa weñni, yḡsàti yoo yḡbící, yoo yèka hḡḡhí meheká, pà de hḡ teè-é-ma-ní mḡkàpa pa tíkábèḡmḡbeka pesá, è t'òò séúka è yò ó hédá kà pá pín bá o tókédi nùdi. Mèḡpà mèe de hḡ nì pín-pa weñni, de hḡ kpeka-á-ma.

7

Sèsí wei-nà Fàdísipa pa bookú paḡma hínka

¹ Kà Fàdísipa nà Weèdi kpḡntìnùka biḡhànapá pàcḡ, é yeñni nà Sèdìsàdém è tēni é tíká Sèsí pesá. ² Kà pá déhá k'òò dapàmma pàcḡ yon nà pa nḡhi yḡkàma, pà pú netà é n'yòna pa bookú paḡma hḡmpú.

³ Fàdísipa nà Sùwífupa tḡpa weñni tḡn-ń-ma pa yàpa paḡma. Pà pú hḡ dii è pú netà pa nḡhi dédéí. ⁴ Kà pà mèe koní-nà-ní kàadi, è pú wekàna pa cḡḡdi, pà pú hḡ dii. Pà tḡmà káá-ma pa kákámú tḡmú dḡḡdi è mù pàkú, kà mù nḡḡ-nà pà kó n'neèkumá kú bookú pa bondiká, nà pa kḡmpohí, nà pa cadiká.

⁵ Mēma-dà tee kà Fàdísipa nà Weèdi kpḡntìnùka biḡhànapá é béka Sèsí è yò: Baà tee k'aa dapàmma pú tḡn paḡma ti yàpa ti héè-ma, è yon pà pú netà?

⁶ Kà Sèsí é pà tḡnà è yò: Èsàyí de naá-ma dédéí, ò de wàḡ tḡn daadí Weèdi wemá yaḡpēndapà néna hínka è yò:

Bookù menkù n dùnti nà ku nùdi-dà
ku yàma pú n tḡsí-nà báa cḡma.

⁷ Héci-dà kù n dùnti-má,
mìi tee-sá, kù biḡhàni-sa yòḡ
nìpa kú kpḡntìnùka-dà¹.

⁸ K'ò tḡmà yò: Ne héu Weèdi kpḡntìnùka-dà, è tḡn nìpa kpéeká.

i 6.48 Pòkahi tḡhí meheká, pà tḡnà è yò ò de kpèi é pà pùda-á-ma.

j 7:7 Dentá-nà Èsàyí 29:13

⁹ K'ó tuèha è yò: Ne non Weèdi kpéntinùka dínápu-dà béékú dédéí-fí, è há pú non è mà hɔn ne bookú paáma kpéésé-è. ¹⁰ Mòyísi de wedà-á-ma è yò: Ní n'cunì a báàa n'aa màa. k'ò de tùmá é tuèha è yò: Kà mènèn wèè-nà-ko kpákpàama o báàa yoo o màa, kà né kòù ye yañn. ¹¹ Àmá, néna há cakú nipa è tonà: Kà nìi cakáà o báàa yoo o màa è hɔn, n de káá-sa è k'áa tempanà, n yè pɛi Weèdi, ¹² ne hɔ mà teha-á-ma, ne koò pú kó hédá k'yèe yañn é tempanà o báàa yoo o màa. ¹³ Ma kú bookú-dà ne kpíini-ma Weèdi wemá cakú-sa, è tɔn ne bookú paáma è mà biɔhòni ne tɔpa. Ne tùmá pakú-ma tɔsa dɔɔdi k'yè yònà miyà.

Mìi pakú-sa nido yókáma Weèdi yìhika

¹⁴ Kà Sèsí è tùmá yíi niku o pesá, é kù caka è yò: N besí-nà sukú ne weñni é yekà n kpèi é n'yòpu. ¹⁵ Yècɛí kɔɔ è kó neé paá nìi yókáma Weèdi yìhika, mìi dúu-sa weñni o nùdi meheká. Àmá, mìi yèhu-sá-ní o meheká, míi-dà ò pakú yókáma Weèdi yìhika. [¹⁶ Kà mènèn káá-ko touka è kó yekà, k'ó yekà.]

¹⁷ Ò hédá tɔn wòni niku é dúú hɔɔta meheká, k'òo dapànma òò béka ye webemú yohènamá kpèi é n'yòpu. ¹⁸ K'ó pà téná è yò: Néna mèetékà, ne mèe té kɔɔ yañmàhàn'á? Ne pú yáá è yò yècɛí kɔɔ è kó neé paá nìi yókáma Weèdi yìhika mìi dúu-sa weñni o nùdi meheká nkéè? ¹⁹ Mìi tee-sá mema, yè pú dúu o yàma meheká, yè hɔ dúú o piidí meheká-dà é kahá yèdi fɔdi béka. Ò de wedà mema è kpèi é caka è yò dipú mùcɔmù pú cidí, mu weñni kó neé dii-í-ma. ²⁰ K'ó tɔhèna è yò: Mìi yèhu-sá-ní nìi yàma meheká-dà hɔ ò kɔɔ yókáma. ²¹ Nìi yàma meheká-dà yañmàhàsika yeèhu-má-ní, k'yè n'yònà: Dɔɔma, nà túùpu, nà niikòùpu, ²² nà dɔɔdí cɔhàma, nà bìnɔ cɔnàma neèmu híñka (kápúdentì), nà mekatohiká, nà niibántàfa, nà sòkací paáma, nà nido sɛdáma o neèmu kpémú, nà tɔò yèdi cɔhàma, nà fónfònti, nà fikàpaáma. ²³ Ye kú nensɔnyà mìi kú wenni yèhu-ní nìi yàma meheká-dà, míi-dà mèe ò pakú yókáma Weèdi yìhika.

Poòo òcɔn dañ Sèsí è pú yòn Sùwífù

²⁴ Kà Sèsí è yídá ye pesá, é taá Tíi yotí. K'ó tèi é dúú hɔɔta tàcɔtà kú meheká, è pú kpèi k'òòcɔn ní n'yáá è yò w'èè péé, w'áá pú nedà é n'sòdi. ²⁵ Y'áá de hɔta poòo òcɔn-dà káá o sepànn kà weèkupá péé o meheká. K'ó yekà kà pà wei o wemá, k'ó tènì é dɔdi-ho o tàka fɔdi. ²⁶ Ye poòo de pú yòn Sùwífùpa bookú kóóó. Pà de ò pedà Sìdó-Fènisí teñka meheká-dà. K'ó tènì é séúka Sèsí è yò ó bɔhà weèkupá mèm̀pà péé-pa o sepànn meheká. ²⁷ Kà Sèsí òò caka è yò: Cedí héé kà bíhí é dii é den, mìi tee-sá yè pú sudi pà tódá bíhí dimá è mà kɔɔ mɔbímú.

²⁸ K'ó téná Sèsí è yò: Bemú-dà n Teù, àmá mɔbímú hɔ n'takù-ú-ma bíhí hɔ n'yon kà mìi nòhú-sa.

²⁹ Kà Sèsí òò caka è yò: Nà wemá a ténà-mà kú kpémú, tɔta é kòn, weèkupá yeè-é-ma a sepànn meheká.

³⁰ K'ó tón é kòn hɔɔta é tèi é n'hɔta ye weèkupá yèdi o sepànn meheká, k'ò dɔɔ dɔɔdí híñka.

Sèsí kpekàna mùko

³¹ Ye kú dàhàka, kà Sèsî é yídá Tî teñka, é yèè Sìtɔ̀̀ tempáàku, nà yotí píta kpékú meheká, è tóníti Kàdìdèè baàdi béka. ³² Kà p'òò teè-ní wòn̄n òcɔ̀̀n k'ò pú n̄n è wei sukú. Kà p'òò séúka è yò ó cɔ̀̀ná o n̄ku o hí̄nka k'ó kpeka. ³³ Kà Sèsî òò tódá kà pá taá béékú é nátá-nà n̄ku, é t̄èi k'ó tódá o hámbíci é taàa ye wòn̄n touka meheká, é t̄údá o n̄ku nūntɔ̀̀tí é pí̄n o denfá. ³⁴ Ye w̄ni, k'ó yoòda o n̄nci hí̄nka, é fueha fuehèc̄h̄ídi è yò: Èfátà! mìi kp̄èi é n'yò-sa hí̄ta!

³⁵ Ye pesá n'èe pesá, k'yèè d̄òò touka é hí̄ta, k'òo denfá é dákádá, k'ó púsí wemá d̄édéí. ³⁶ Kà Sèsî é pà caka è yò pà dá héé k'òòcɔ̀̀n é mà yèkà. K'ò há de hí̄n pà dá mà caka òcɔ̀̀n, pà de hí̄n d̄hà è mà pidá-á-ma páati weñni. ³⁷ K'yé dii n̄pa sàma m̄óma kà pá wei è tonà: Ò p̄akú-sa weñni suu-ú-ma d̄édéí. Ò héu múndikaà kà wòma-dà you, kà mùkàpa wei.

8

Sèsî dià n̄pa tòhika kànàhì

¹ Ye kú daàka meheká, kà n̄ku d̄óódi é t̄úmá peèta Sèsî pesá, è k̄óó kù kó dii-sá. Memá-dà, k'ó yíi o dapàmma é pà caka è yò: ² Séèma-dà n káá n'èe n̄kù kpémú, mìi tee-sá yè hí̄n daàka kàtāa-dà memà, kà kù n p̄éè-nà kù koò pú káá kù kó dii-sá. ³ Kà n m̄èe hí̄n kù kòn̄ nà k̄oni, kù kó h̄eka-á-ma tantápu, mìi tee-sá ku n̄i p̄àcɔ̀̀y yèèni deùma-dà.

⁴ K'òo dapàmma òò t̄éná è yò: Ti kó d̄étá ya-dà dimá càwenkù menkù kú meheká é diá é denkàna n̄kù menkù kú wenni?

⁵ K'ó pà béka è yò: P̄è̄pa p̄àd̄eè-dà ne káá-ma?

Kà pà yò: P̄àyehì.

⁶ K'ó caka ye w̄ni ye n̄ku è yò kú kaàdi teñka. K'ó tódá ye p̄è̄pa payehika, é seda Weèdi, é pà wéha é k̄óó o dapàmma è yò pá pà totá ye n̄ku weñni, kà pá mà hí̄n. ⁷ Pà de t̄úmà káá-ma séèka. K'ó seda Weèdi nà ka kpémú, é caka o dapàmma è yò pà m̄èe té kà totá n̄pa. ⁸ Kà pá dii é den. K'òo dapàmma é t̄íká ye fiika m̄ènkà de s̄j̄ntà-ka, kà ká s̄j̄ná námbòhi híyehì. ⁹ N̄pa m̄èmpà de dii-pà de yòc̄-ó-ma tòhika kànàhì kpéemá. Ye kú dàhàka, kà Sèsî é pà wihina. ¹⁰ Ò pà wihina-ma, é cemá dúú hà̄apu meheká n'òò dapàmma, kà pá kahá tempáàku pà toò-ku Dàdìmànùtáa.

Fàdìsipa békú p̄óntápāama

¹¹ Kà Fàdìsipa é t̄èni é cetá-nà Sèsî n̄n̄dhicì è kp̄èi òò beí. Kà p'òò béka è yò ó p̄á p̄óntápāama m̄emà p̄éè-nà-ma-ní hí̄nka, é beka è yò o n̄òti p̄éè-nà-ní Weèdi pesá-dà. ¹² K'ó fueha fuehèc̄h̄ídi è yò: Badà tee kà wòn̄kù menkù kú n̄pa békú p̄óntápāama? N ne cakú webemú-dà, pà pú kó déhá p̄óntápāama màc̄ómà. ¹³ Ye kú dàhàka, k'ó pà hédá ye pesá, é dúú hà̄apu meheká, é deèta ye baàdi sóidi t̄òdi.

P̄á-nà yòkàma nà Fàdìsipa nà wódo Hèdòti

¹⁴ Kà Sèsî dapàmma de dúí pà kó tódá-ma p̄è̄pa. Pà de káá òcɔ̀̀-dà pa hà̄apu meheká. ¹⁵ K'ó pà caka è yò: P̄á-nà yòkàma nà Fàdìsipa p̄è̄ yòmu yíkànasá nà wódo Hèdòti kp̄éesá hí̄nka.

¹⁶ K'òo dapàmma é cetá è wei-nà pa t̄òpa è tonà: Ò ti wei-nà mema, mìi tee-sá ti pú toó-ma kpémú-dà p̄è̄pa.

¹⁷ K'ó bantá pà de wei-sa é pà béka è yò: Baà tee kà ne wei è tonà ne pú toó-sa-ní kpémú-dà pèèpa? Ne mum pú yádà ne mēe mum pú yeèkeè? Ne toòka-dà kpenì nkéè? ¹⁸ Ne káá-dà-ma nònci, ne pú dìi-a? Ne káá-dà-ma toùka, ne pú you-a? Ne koò pú dèn, ¹⁹ n wéhàà t́ín daadí pèèpa pànùm, kà nìpa tòhika kànùm é pà dii? Námbohì hìdēe-dà ne de t́íkà-ma mìi śjntà-sa?

Kà p'òò t́ená è yò: Pfi-hidéé.

²⁰ K'ò t́umà yò: N há de wéhàà pèèpa pàyehì kà nìpa tòhika kànàhì é pà dii, kà né t́íkà śjnyá námbohì hìdēe-dà?

Kà pà yò: Hiyehì.

²¹ K'ò yò: Kà n'aá mum pú yeèkaà?

Sèsí kpekàna yònn Bètìsàidàà

²² Kà pá yíí é taá yotí pà toò-ti Bètìsàidàà, é t̀ei ye pesá kà p'òò teè-ní yònn, óò séúka è yò óò pín k'ó kpeka. ²³ K'ó cèè ye yònn nòku, óò dèdi óò dèna ye yotí, é t̀ei é paá o nònci nuùt̀otí, é c̀nà o nòhi o h́nka óò béka è yò: A dii yèc̀fi?

²⁴ K'yèe yònn é diida-ní è yò: N dii-í-ma nìpa, àmá n pà dii kà pà yònà tená-dà è c̀enti. ²⁵ K'ó t́umá c̀nà o nòhi ye yònn nònci h́nka, k'ó diida fau. Ò de kpekáa-á-ma, è kó neé baàta niìi weñni nà deùma. ²⁶ Kà Sèsí óò caka è yò: Tòòta é kòn a h́jòta, a dá cemá tón yotí còhòka.

Píyéè wedà è yò Sèsí yòn Weèdi takadáko

²⁷ Ye kú dàhàka, Sèsí n'òò dapàmma kà pá n'kódí yòbící m̀enci yéntà-ci Sèsàdèe-Fidípù yotí, é n'sáá còku, k'ó pà béka è yò: Nìpa wei n h́nka è toò n yòn wodà?

²⁸ Kà p'òò t́ená è yò: Pàc̀j toò a yòn Ìsá-Bàtìsì-dà, kà tòòpa toò a yòn Èdíi, é yíí kà tòòpa t́umà toò a yòn Weèdi weténápa p'òòc̀j-dà.

²⁹ K'ó t́umá pà béka è yò: Néna hákà tá, ne toò n yòn wodà? Kà Píyéè óò t́ená è yò: A yòn Kídìsì-dà. ³⁰ Mémá-dà, kà Sèsí é pà fedí hámbíifá é pà caka è yò pà dá yetá mà caka òc̀n.

Sèsí wei o kúmú n'òò yántáma wemá, nà nìi yònà óò t̀ùnkàma

³¹ Ye wòni, k'ó cetá o dapàmma biòhànapú, é pà caka è yò: Yè békú-ma Niífòuò bíitá é dii nánkú sàma. Yotí kpèmma, nà d̀hàka yaàmma kpèmma, nà Weèdi kpéntìnùka biòhànapá kó tà yee-é-ma, é tà kòù, dataádi kà tá yántá-ní. ³² Ò de pà cakáa ye wemá pópóí-dà. Mémá-dà, kà Píyéè óò yíí béékú é t̀ei óò wédi-nà è yò ò dá n'wekú mema kú bookú. ³³ Àmá, kà Sèsí é fitá é wántá o dapàmma é k̀j-nà Píyéè è yò: Nátá n pesà Weèkupá wódo f́jín! A yaàmmàhàka pú yòn Weèdi kpéeká, kà yòn nìpa kpéeká-dà.

³⁴ Ye kú dàhàka, kà Sèsí é yíí ye nìku n'òò dapàmma é pà caka è yò: Kà m̀enn kpèi é n t̀ùna-kó, k'ó héé o m̀ónn d̀ókàma, é tóó o kpíidókú^k é toó é n t̀ùna. ³⁵ M̀enn kó n'kpèi-kó é f́hina o f̀òumu, ò kó mù féná-ma. Kà m̀enn mèe mù fénà-ko nà n kpémú, nà Weèdi wenaamá kpémú, ò kó mù déta-ma. ³⁶ C̀jntídi m̀móni-dà nìi kó n'káá-ma, k'ò déta f̀òuku kpéesá weñni, áá sehèna o sèdi?

³⁷ M̀mónyá-dà ò kó neé k̀j-ma é t́umá nì dontá? ³⁸ Kà f̀eci káá nido nà n kó n'yòn-ma o dakpènn,

n'òò kó n'cuni-ma n wemá sákù kú nìpa còhòka mèm̀pà pú códí-pa è tùmà pú you-nà Weèdi toòka, fèci-dà m̀eè té kó wántá nà n káá o kpémú mmí niifòùo bíítá, n kó tóní t́ín daadí nà Weèdi tontòndiwenipá n Báàa wehimú meheká.

9

¹ Kà Sèsî é tùmá pà caka è yò: N ne cakú bemú-dà, pàc̀j pée-ma miì è kó déhá Weèdi wòòti nà ti kpeèti é neé kpíí.

Sèsî wò̀nti pentà

² Kà daàka kàkòdì é kahá, kà Sèsî é tódá Píyèè, nà Ìsákì, nà Ìsáà, kà pá dìsi tadeudí nìc̀j̀nì kú h́ínka, é t̀eì é m'pée ye pesá pa c̀j̀dì. Pà pée-sa-dà, k'òo wò̀nti é pentà pa yìhika. ³ K'òo báatí é péidá wédédé è sikàdi, bá nempòkàdakó òc̀j̀n kóò tenkà menkà kú h́ínka è kó neé pòkàda neñti é tì péikàna ma kú bookú. ⁴ Ye pesá, kà pá n'hòtá Èdî nà M̀yìsì fodá-ní òò wei-nà. ⁵ Kà Píyèè òò caka è yò: Dakpè̀nn, ye sudi tí m'pée miì-dà. Héé kà tí ṕíná f́íná nàt̀aa, f́j̀n kùc̀j̀, M̀yìsì kùc̀j̀, Èdî tókú.

⁶ Ò de wei mema, miì tee-sá, ò de koò pú yáá ò kó n'hímù. Wantaf̀di-dà de pà c̀eè dédèí pa weñni. ⁷ Kà pá déhá, kà wò̀dì é t̀eni é pà c̀j̀na ni wéma. N'èe wò̀dì meheká-ní, kà pá yekà Weèdi boòku kà kù tonà: Meǹn yò̀n n bíítá-dà, n tà dósí-ma sukú, tà besí-nà. ⁸ Ye wò̀ni n'èe wò̀ni, kà pá wán-wántá pà koò pú déhá òc̀j̀n Sèsî bààsí nà mempa.

⁹ Kà pá n'sínti-ní ye t̀aàdi, kà Sèsî é pà caka è yò pà dá yetá ca-caka òc̀j̀n pà déhá-sa, háá é n'sànà Niifòùo bíítá kó yántá-ma-ní kpíípa meheká. ¹⁰ Kà pá teha ò pà h́impú, àmá è békú pa tò̀pa è tonà: Baà héé é yántá-ní kpíípa meheká?

¹¹ K'òo dapàm̀ma òò béka è yò: Baà tee kà Weèdi kpé̀ntìnùka biòhànapá wei è toò: Yè békàà Èdî-dà é cetá tóní? ¹² K'ó pà t̀ená è yò: M̀omasí-dà, Èdî yò̀nà é cetá tóní-ma-ní é t̀eni d̀hà niìi weñni ye de yò̀mpu. Badà h́á tee kà pá waàta Weèdi wemá pòkàta meheká è yò: Niifòùo bíítá yò̀nà é dii nánkú-dà sàma, pà m̀eè pú kó tà kèda yèc̀èè? ¹³ Àmá, n ne cakú è yò Èdî yò̀ tómpu-dà-ní, kà p'òò paà pà kpèi-sá weñni, k'yé n'yò̀nà pà wàkaàma Weèdi pòkàta meheká o h́ínka.

Sèsî b̀hàa weèkupá bíítá tàc̀j̀tà kú meheká

¹⁴ Pà tóní-ní t́ín wò̀ni o dapàm̀ma tò̀pa pesá, é t̀eni déhá niku dóòdì kà kù pà yéntà, kà Weèdi kpé̀ntìnùka biòhànapá pà nòhù-nà. ¹⁵ Ye nìpa déhá-ma Sèsî, k'yé pà dii sàma, kà pá cemá cocí é taá o peeta-nà-pu, è k'òò d̀wa. ¹⁶ K'ó béka o dapàm̀ma è yò: Ne pà nòhù-nà m̀mónyà kú h́ínkà-dà?

¹⁷ K'òòc̀j̀n òò t̀ená-ní ye niku meheká è yò: Dakpè̀nn, m'a t̀eè-ní n bíítá-dà, kà weèkupá pée ta meheká, è yení tà kó weé-ma. ¹⁸ Kà pà baà yî-di bèmbèni, pà h́j̀ tà héi-ma teñka, kà nùntám̀pùùti té n'yèèhu-ní ta nùdi meheká, kà tá n'kédì ta nika, è té h́j̀n setedemu. Ká n còhà a dapàm̀ma è yò pá pà b̀hà, kà pá h́eka.

¹⁹ K'ó pà caka è yò: Dandankó̀pà néna! Háá wò̀ni m̀móni-dà n baà kó ne m'pée-nà-ma? Háá daadí m̀móni-dà n kó m'pakú-ma mùỳ ne h́ínka? N yaà-nà-ní ye bíítà miì!

²⁰ Kà pá tà n'òò teèní. Ye weèkupá déhà t́ín wòni Sèsî, é cemá tà sàmpà kpeéma, kà tá dodi teñka è bípú kà nuùtámúpúti yeèhu-ní ta nùdi meheká. ²¹ K'ó béka ta báàa è yò: Háá-nà daadí mmóni-dà yè tà hɔn-má mema?

K'ò yò: Háá-nà ta bíkámíbíikú. ²² Còkumá dódidi, pà hɔ tà héi-ma hamú meheká yoo néemá meheká, è kpèi é tà kòù. Àmá, k'à kó neé é paá yècɛɛ, k'à ti kón séema, é ti tempanà.

²³ Kà Sèsî òò t́ená è yò: A yò kà n kó nedá dó? Mèhèn dañ-ko, pà kó paá-ma nihi wehni o kpémú.

²⁴ Ye wòni n'èe wòni, k'yèe bíitá báàa é weé kpeéma è yò: N dañ-ma. N tempanà, mìl tee-sá, n dandaní pú wehi.

²⁵ Sèsî hɔtà-ma niku dódidi t́íkánì-ní, k'ó wédi-nà ye weèkupá è yò: Weèkupà néna mèm̀pà wòni-pa è dákánì nihi denfá, mmí-dà mà ne hɔn, yèè-nà ye bíitá mehekà ne mèe koò dá tóní daadí yèni!

²⁶ K'yèe weèkupá é tóò hodí, é sàmpà ye bíitá kpeéma é yèdi ta meheká. Tà de yònà tà kpíi-má-dà, kà nipa dódidi toò: Tà kpíi-í-ma. ²⁷ Àmá, kà Sèsî é cɛɛ ta nòku é tà yíkàna-ní, kà tá yídá é neèhi.

²⁸ Sèsî kun t́ín wòni hɔ̀ta, k'òo dapàm̀ma òò béka pa cɔ̀̀di pesá è yò: Baà tee kà t́inti pú neé é bɔ̀hà ye weèkupà-ní?

²⁹ K'ó pà t́ená è yò: Ye kú weèkupà bookù, nà weèdɔ̀̀pu cɔ̀̀di-dà pà hɔ neé pà bɔ̀hà-nà-ma.

Sèsî t́imà cakú o kúmú n'òò yántáma wemá

³⁰ Ye kú dàhàka, kà pá yídá ye pesá é butá Kàdídèè tempáàku meheká. Sèsî de pú kpèi pá n'yáá ò péé-kà békà, ³¹ mìl tee-sá, ò de bihànì ò dapàm̀ma-dà è pà cakú è tonà: Pà kó taàa-á-ma Niifòò bíitá nipa nòhi meheká, kà pá tà kòù, datà̀di daadí, kà tá yántá-ní kpíipa meheká. ³² O dapàm̀ma há de pú yeèkaà ye wemà kpèi é n'yòpu, pà mèe de pú neé é cɔ̀̀na kunò̀̀fa òò béka.

Wodà yòn sàò ti cɔ̀̀hàkà?

³³ Kà pá tantá Kàpè̀̀nàú̀̀m. Pà péé t́ín wòni hɔ̀ta meheká, kà Sèsî é béka o dapàm̀ma è yò: Mmóniyá-dà ne de nɔ̀̀hù-ma-ní còku?

³⁴ Kà pá n'yòn cém, mìl tee-sá, pà de nɔ̀̀hù-ú-ma-ní còku è kó yáda pa mèhèn yòn-ko sàò. ³⁵ K'ó kaadi é yíi ye o tɔ̀̀tɔ̀̀ndipá píi-pàdèé é pà caka è yò: Kà n'ò̀̀cɔ̀̀n kpèi é n'yòn sàò, k'ó hɔn dèndèhɔn tɔ̀̀pa wehni meheká, é n'dehú pa kpémú.

³⁶ Ye kú dàhàka, k'ó tódá bíitá sɔ̀̀mmò̀̀nta é tà nèhina pa cɔ̀̀hàka, é tà hòpu-nà, é yò è pà caka è yò: ³⁷ Mèhèn kó codá-ko bíitá mentà kú tɔ̀̀ta nà n yèdi, mmí mónnì-dà ò codà-ma. Mèhèn mèe n codà-ko, ò pú codà mmí mɔ̀̀-mónnì, ò codà mèhèn n tɔ̀̀n-kó-dà-ní.

Mèhèn pú yení-ko ti paáma, ò yòn ti kóó-dà

³⁸ Kà Ísáà òò caka è yò: Dakpè̀̀n, ti déhà-á-ma nido òcɔ̀̀n, k'ò yún a yèdi è bɔ̀̀hu-nà weèkupá nipa meheká, kà ti mèe òò bɔ̀̀hà, mìl tee-sá, ò pú yòn ti kóó.

³⁹ K'òò t́ená è yò: Dá ò bɔ̀̀hà-nà, mìl tee-sá, ye yañn kó è kó yíi n yèdi é paá póntápaáma, é t́imá yò è weé kpákpàama n hɔ̀nka ye wòni n'èe wòni. ⁴⁰ Mèhèn pú ti sɛ́-ko, ò yòn ti kóó-dà.

⁴¹ Webemú-dà n ne cakú-ma: Mèhèn kú wehni kó ne paá-kó néemá kà né yáà, è yò ne yòmpu kpémú Kídísì kpéepá, ò pú kó mónka o boutí.

Tòò yehènamá

⁴² Kà mènñ yehèna-ko bíhì mènñ n dañ-hì hi tàcɔ sɪima meheká, yè kó n'tɔu-ú-ma pá yíná ye yañ tásàku o fɔkú, óò káñtá dàmédì meheká. ⁴³ K'aa nòku-dà héè k'à pàkú sɪima, k'á kù fita. Ye tɔu-ú-ma á dúú fòumu mèmù bá yòo-pú meheká nà nòku kùcɔ, n'aa kó n'káá-ma hídéé è há dúú hǎbíiní, hamú mèmù pú kɔn-pú meheká. ⁴⁴ [Ye pesá, beuka mènka yon-ká wɔnti pú hɔ kpíí, hamú mèe pú hɔ kpíí.] ⁴⁵ K'aa tàdi-dà héè k'à pàkú sɪima, k'á nì fita. Yè tɔu-ú-ma á dúú fòumu mèmù bá yòo-pú meheká nà tàdi nìcɔ, n'aa kó n'káá-ma kàdéé è há dúú hǎbíiní meheká. ⁴⁶ [Ye pesá, beuka mènka yon-ká wɔnti pú hɔ kpíí, hamú mèe pú hɔ kpíí.] ⁴⁷ K'aa nònfa-dà héè k'à pàkú sɪima, k'á fà kokadá. Yè tɔu-ú-ma á dúú Weèdi wóòti meheká nà nònfa fàcɔ, n'aa kó n'káá-ma cìdéé è há dúú hǎbíiní meheká. ⁴⁸ Ye pesá, beuka mènka yon-ká wɔnti pú hɔ kpíí, hamú mèe pú hɔ kpíí. ⁴⁹ Bá mènñ dèè-ko kó yèè nánkú hamú meheká-dà, k'yé teha k'òo fòumu é dètá kókómú, é weka póí. ⁵⁰ Kókómú yòn niì suu-sá-dà. Àmá, kà mù fénà mu naakú, pà kó tùmá mù nakàna nà ba? Ne fòumu ní n'nadi é n'yònà kókómú, k'yé teha kà né n'naa-nà ne tɔpa.

10

Dayedàma nà poyedàma

¹ Kà Sèsí é yídá ye pesá, é taá Sùdée tempáaku meheká, é tèi é deeta-nà Sùtèè kónkú sóidi tɔòdi. Kà nìku dódí é tùmá peeta o pesá, k'ó cetá è pà bihàni Weèdi wemá, ò baà hɔ n'hɔmpú. ² Kà Fàdísipa pàcɔpà é tènì o pesá è kpèi óò beñ. Kà p'òò béka è yò: Weèdi kpéñtìnuka pɛi-í-dà nido nùdi è yò ó bɔhà o poòo? ³ K'ó pà tɛná è yò: Mòyisì ne kɔɔ kpéñtì nùdi mòmni-dà ye hɪnka? ⁴ Kà pà yò: Mòyisì pɛi nùdi è yò kà niì kó bɔhà o poòo, k'òò wàhà pòkàta mènntà cakú-ta è yò òò yedàa-á-dà, ye wòni óò bɔhà. ⁵ Kà Sèsí é pà caka è yò: Ne tokpekú kpémú-dà tee Mòyisì de ne kɔɔ-ma ye kú kpéñtì nùdi. ⁶ Àmá nà cetáma-ní, yè de pú yòn mema. Weèdi de pàɔ tɪn daadí niya weñni, nì de pàɔ dɔò nà poòo-dà. ⁷ Ye kú kpémú-dà tee, dɔò té kó yíi-ma é héè o báaa n'òo màa, é taá daadi n'òo poòo, ⁸ pa déèdi kà pá hɪn nido òcɔ¹. Pà koò pú kó n'yòn ye wòni niì pàdéé, àmá òcɔ. ⁹ Yè yòn-mà mema, niì dá yetá é yaàta Weèdi múnà-sa. ¹⁰ Pà kun tɪn wòni hɔɔta, k'òo dapàmma é tùmá óò béka ye wemá hɪnka. ¹¹ K'ó pà tɛná è yò: Kà niì bɔhàa o poòo è tóò tɔò, ò cɔhú dɔɔdí-dà o pocecedó pesá. ¹² Kà poòo mèe yedàa o dɔò è taá è tóò tɔò, ò mèe té cɔhú dɔɔdí-dà o dacecedó pesá.

Sèsí kónà bíhí

¹³ Kà nìpa é m'pení-nà-ní bíhí Sèsí pesá è kpèi ó cɔnà o nòhi hi hɪnka é hì kóná, k'òo dapàmma é yeda è pà kɔnti-nà. ¹⁴ Sèsí déhà-ma miya, k'yé ò donka k'ó caka o dapàmma è yò: Héè-nà kà bíhí é tènì n pesá. Ne dá hì kpaná miì tee-sá, Weèdi wóòti péé mèmùpà hì yònà-pa kpémú-dà. ¹⁵ Mòmasí-dà n ne cakú-ma. Kà mènñ pú tehàa-ko Weèdi wóòti o hɪnka é n'yònà bíitá, ò pú kó neé é dúú ti meheká. ¹⁶ Ò wedà-ma mema é yò, é tóo-ní ye bíhí é hì hòpu-nà, é cɔmu o nòhi hi hɪnka, é hì kóná.

Sèsî nà káma yañn òcɔ̀n

¹⁷ Sèsî de kpèi é cɛ́ɛ́ tɪ́n wòni còku, kà nido òcɔ̀n é tɛni o pesá è cokù-ní, é tɛni é hiu o yìhika óò béka è yò: Dakpɛ́nsudó, n kó paá badà é déta fòumu mèmù bá yòpú? ¹⁸ Kà Sèsî óò caka è yò: Badà tee k'á n yíi sudó? Nido òcɔ̀n kós è sudi, Weèdi cɔ̀ɔ̀di bàasi. ¹⁹ A yáá-dà-ma Weèdi hɔ̀wenci nùka mènka hɪ́n-ká: A dá yetá é kùù nido, a dá yetá cɔ̀ha dɔ̀dí, a dá yódá, a dá n'centi è cɔ̀hú tɔ̀o yèdi, a dá yetá dii tɔ̀o tàkeci, á n'cuuni a báaa n'aa màa^m. ²⁰ K'yèe káma yañn óò tɛná è yò: Dakpɛ́nn, n tunà-á-ma ye kú nùka wenni nà n dapànku wòni. ²¹ Kà Sèsî óò wántá, óò seda, óò caka è yò: Niìi yècɔ̀-d'aa dóntà. Tòta, é taá yeda a káa-sa weñni, é tóo ye díci é ci totá péhí. K'á hɪ́n mema, a kó yaá déta-ma káma Weèdi pesá. K'á paá miya è yà, k'áa yaní é n tuuna. ²² Ye káma yañn yeèka-ma mema, k'òo yàma yò kò, k'ó yídá é kàhá mìi tee-sá, ò de káa káma-dà sàma.

²³ Kà Sèsî é wántá wántá o dapànma mèmpa de ò yéni-yéntà-pa é pa caka è yò: Yè kó n'dòn-í-ma sàma nà káma yañma kó himá é dúú Weèdi wóoti meheká. ²⁴ K'yé dii o dapànma nà wemá ò de pa cakáa-ma. K'ó sɔ̀kadá wemá é pa caka è yò: N dóopa-nà! Yè kó n'dòn-í-ma nà niì kó dúú-ma Weèdi wóoti meheká. ²⁵ Káma yañn dúúma Weèdi wóoti meheká kó n'dòn-í-ma é haá bonamáku kó yèè-ma yáafá bòdi. ²⁶ K'yé dèhà é dii o dapànma, kà pa békú pa tɔ̀pa è tonà: Kà memá-dà, wod'áa kó déta fítama? ²⁷ Kà Sèsî é pa wántá è yò: Nipa kó hɛka-sá paápu, Weèdi k'èe paá-ma, mìi tee-sá ni pú hɛkú yècɛ́ɛ́. ²⁸ Kà Píyèè óò caka è yò: Nte, tɪ́nti hée-ma-ní niìi weñni é tɛni áa tuuna. ²⁹ Kà Sèsî óò tɛná è yò: N ne cakú móma-dà. Kà niì yíi è hédà o hɔ̀ta, yoo o kúcàpa, yoo o potɔ̀pa, yoo o báaa, yoo o màa, yoo o bíhí yoo o yèka nà n kpémú nà Weèdi wemá kpémú, ³⁰ ò kó déta-ma pemà memà kú meheká, ò hée-sa-ní còkumá kùta. Ò kó déta-ma hɔ̀hí, nà kúcàpa, nà potɔ̀pa, nà màapa, nà bíhí, nà yèka, é péè-nà fákápama. Kúñweñni daadí, k'ó wántá déta fòumu mèmù bá yòpú. ³¹ Nipa dɔ̀ɔ̀di mèmpa yòn-pa cecepá yenì kó wántá hɪ́n dèndèma-dà, kà nipa dɔ̀ɔ̀di mèmpa yòn-pa dèndèma yenì é wántá hɪ́n cecepá.

Sèsî cakú taáma o kúmú n'òo yántáma

³² Sèsî n'òo dapànma kà pa n'tùn còku è póni Sèdisadém, k'ò nihí yìhika, k'òo dapànma bòti pudì, kà wantafɔ̀di káa mèmpa de pa tɪ́n-pá. K'ó tɪ́má tódá ye o tɔ̀ntɔ̀dipá pî-padéé kà pa cɛ́ta béékú pa cɔ̀ɔ̀di pesá, k'ò kpèi é pa caka mìi de k'òo tɛni-sá-ní. ³³ K'ò yò: Nte kà ti póni Sèdisadém. Ye pesá-dà pa kó taá cɛ́ɛ́-ma Niifòuo bíitá, é tà tàa dèhòka kpémma nà Weèdi kpéntinùka bihànapá nòhi meheká, kà pa deèna nùdi sídama meheká è yò pa tà kòù, ye wòni é tà tàa mèmpa pú yáá-pa Weèdi nòhi meheká, ³⁴ Kà pa tà dehí, é túha ta hɪ́nka, é tà podí dáafa, é yòo tà kòù. Dataádi daadí, kà tá yántá-ní.

Sàákì nà Ìsàá Sèbèdèè bíhí còhòma

³⁵ Kà Sèbèdèè bíhí, Sàákì nà Ìsàá é hétá-ní Sèsî pesá é tɛni è yò: Ti dakpɛ́nn, ti kpèi á ti paá ti k'áa còhà-sa-dà. ³⁶ Kà Sèsî é pa béka è yò: Ne kpèi ní paá badà ne kpémú? ³⁷ Kà pa yò: Ti kpèi k'á wántá kàdi a wóosàti meheká, k'á héé kà tí n'kaadi àa pèdi-nà-á-ma, òcɔ̀ a hiòma, tɔ̀o a

cànkamá. ³⁸ Kà Sèsî é pà tɛná è yò: Ne pú yáá ne còhu-sá. Wèéwèdo bondedí n kó nì-di, ne kó neé nì nì-í-dà ? Náńkú cònti pà kó n còntá-ti, ne kó neé tì pàá-dà é n'yònà mmí? ³⁹ Kà p'òò tɛná è yò: Ti kó neé-ma. K'ó pà caka è yò: Móma-dà ne wedà-ma è yò ne kó neé é toó wèéwèdo n kó toó-ko, é dii náńkú n kó dii-kú, ⁴⁰ àmá miì héé-sa mènè kó n'kaadi-kó n hiòma yoo n cànkamá, mmí pú kɔ̀ni ye kú kààkà. Weèdi-dà kà kɔ̀ni nì kà dɔ̀haa-pa kú kpémú. ⁴¹ O dapàmma píta tɔ̀pa yeèkaà-ma miya, kà pá mɔ̀ka-nà Sàákì nà Ìsáá fɔ̀di. ⁴² Memá-dà, k'ó pà yíi pa weñni é pà caka è yò: Ne yáá-dà è yò, ti dii-pà è pà toò boocí wóopa, pà hɔ̀ n'wódi pa nipa hínka nà kpeèti-dà. Mèmpà mèe hɔ̀ n'yòn-pa nɔ̀ti yaɔ̀mma boocí meheká hɔ̀ n'nɔ̀nta tɔ̀pa-dà. ⁴³ Hákà, yè pú yònà é n'yòn mema ne còhka. Múndikaà, kà n'òòcɔ̀n kpèi é n'yòn kpènn ne mehekà, ò yònà é n'yòn ne deho-dà. ⁴⁴ Kà ne mènè kpèi é n'yòn-ko cecedó ne còhka, k'ó hɔ̀n tɔ̀pa weñni núnn, ⁴⁵ è yáá Niifòuò bíitá pú tɛni è kpèi pá deha ta kpémú, àmá tà tɛni è kpèi é deha nipa kpémú-dà, é kɔ̀nà ta fòumu é dontá niku dóódi.

Sèsî dihina Bàtimèè

⁴⁶ Kà pá tantá Sèdikòò yɔ̀tí. Sèsî yèti tɔ̀n wòni ti meheká n'òò dapàmma kà niku dóódi ò tɔ̀n, kà yònn òcɔ̀n kàdi còku béékú è còhu. Ye yònn yèdi-dà de deè Bàtimèè, k'òò báaa kpéedí héé Tímèè. ⁴⁷ Ò yèkaà-ma kà pà yò Sèsî Nàsàdèti kóoó-dà kɛ̀hedi, k'ó cemá cetá è dedì è tonà: Sèsî, Dàfítì bidà, n kɔ̀n séema. ⁴⁸ Kà nipa dóódi ò kɔ̀nti-nà, òò wédi-nà è tonà ó kpíi, k'ò mèe é dɔ̀hà é dedì kpeéma è yò: Dàfítì bidà, n kɔ̀n séema. ⁴⁹ Kà Sèsî é neèhi è yò: Ò yíi-nà-ní. Kà p'òò yíi, òò caka è yò: Paa a kpéeti é yíi-ní, w'aa yún-ní-ma. ⁵⁰ Memá-dà, k'ó cemá é wéi-ho o tókésadi, é fékédá é neèhi-hɔ̀, é tɛni feñ-feɔ̀mma Sèsî pesá. ⁵¹ Kà Sèsî òò béka è yò: A kpèi m'aa paa ba? K'òò tɛná è yò: N dakpènn, n kpèi á n dihina-á-ma. ⁵² Kà Sèsî òò caka è yò: Tɔ̀ta, a dandaní-d'aa kpekàna. Ye wòni n'èe wòni, k'ó cemá é diida. Ò didà-ma, é cemá n'tɔ̀n Sèsî còku hínka.

11

Pà codà Sèsî è yònà wódo Sèdùsàdém

¹ Pà pàti tɔ̀n wòni Sèdùsàdém, è beé-nà yɔ̀bíci pà toò-ci Bètífàsèè nà Bètàní, kà cì pèe-nà òdífuna taàdi, kà Sèsî é tɔ̀n o dapàmma pàdèé, ² é pà caka è yò: Taá-nà yɔ̀ti mèniti péé-ti ne yihika. Kà ne tɛi è tì dúú, ne kó déhá-ma sammùm̀bíidí k'òcɔ̀n mum pú nì dáá daadi yèni, kà nì pídí. Né nì pítá-ní é nì yaàni. ³ Kà nì ne békàà è hɔ̀n: Badà tee kà ne nì píikú? Kà n'òò tɛná è yò: Teó-dà nì kpèi. Ye wòni, ò kó héé-ma kà né nì tɛni miì sánsákù. ⁴ Kà pá kaha, é tɛi é déhá sammùm̀bíidí kà nì pídí tapaadi còku béékú, hɔ̀ta tàcɔ̀ta kú hánnùdi, kà pá cemá nì pítá-ní. ⁵ Nìi pàcɔ̀ mèmpà de péé-pa ye pesá, kà pá pà béka è yò: Ne pakú badà ye pesà-ní? Badà tee kà ne píikú ye sammùm̀bíidí-ní? ⁶ Kà pá pà tɛn-tɛná Sèsî de pà himpú-ní, ye wòni k'yèe nipa é pà hédá kà pá nì kaha-nà. ⁷ Kà pá nì dèdi é nì tɛni Sèsî pesá, é tɛni tódá pa tóhòka é pohà ni hínka, kà Sèsî é diisi é kaadi. ⁸ Kà nipa dóódi é pitá pa tóhòka còku hínka, kà tɔ̀pa é pitá faati pà badi-tí-ní foñni meheká. ⁹ Mèmpà de péé-pa o yihika nà mèmpà de tɔ̀n-pá o dàhàka, kà p'òò dùnti kpeéma è tonà: Weèdi yèdi é wehika! Kónama é m'péé-nà mènè pení-ko-ní nà Bateó yèdi. ¹⁰ Weèdi é kóna

wòoti mèn̄ti pení-ti-ní, ti yàdo Dàfítì kpéetí. Weèdi yèdi é wehika hín̄ka sàka meheká ¹¹ Kà Sès̄fì é tantá Sèdùsàdém̄, é tèi é dúú Weèdi h̄j̄ta meheká, é códí mìi de p̄akú-sa weñni. Ò cós̄-ma mema é yà, è h̄j̄ta weèdi d̄odi, k'ó taá Bètàn̄fì n'òo t̄ont̄ondipá p̄fì-pàdée.

Sès̄fì n̄odáa k̄ankamú

¹² Ye kú kún̄weñni, kà pá n'yetì Bètàn̄fì, kà kòni é c̄eḡ Sès̄fì. ¹³ K'ó déhá nà deùma fikiyèè tepú kà mù káá fāati sukú, k'ó taá é dentá k'ò kó déta bíiká. Àmá, ò mù hétà-ma-h̄, é tèi é n'h̄j̄ta fāati c̄j̄di-dà, mìi tee-sá mu pedá w̄oni d̄o. ¹⁴ Ye w̄oni, k'ó weé-nà ye tepú è yò: Òc̄j̄n̄ koò pú kó dii a bíiká daadí yèni. K'òo dapàm̄ma é mà yèkà.

Sès̄fì b̄haa tantam̄ma Weèdi h̄j̄ta meheká

¹⁵ Kà pá tantá Sèdùsàdém̄, é tèi kà Sès̄fì é dúú Weèdi h̄j̄ta meheká, é cetá è b̄hu mèm̄pà de yeé-pa nà mèm̄pà de don-pá ta meheká. K'ó wé-wétá mèm̄pà de ceèni-pá díci tábídipa nà mèm̄pà de yeé-pa p̄and̄oka k̄aahi. ¹⁶ Ò de pú hédà kà p'òoc̄j̄n̄ é tódá neñku kùc̄kù é kù dèida-nà Weèdi h̄j̄ta mùñku. ¹⁷ Ye kú dàhàka, k'ó cetá pa bih̄anapú è yò: Pà pú w̄atà Weèdi wemá meheká è yò, Weèdi h̄in̄ ni h̄j̄ta kó n'yòn̄ Weèd̄ōpu kpéetá-dà boocí weñni kpémú d̄o? Àmá kà néna há tà kpáh̄inà túpa peetadí. ¹⁸ Kà d̄h̄òdi kpém̄ma, nà Weèdi kpé̄nt̄in̄uka bih̄anapá é yekà ò de p̄a-sa, kà pà penti pà kó h̄impú óò k̄ò. Pà há de ò wani-í-ma, mìi tee-sá ñiku weñni de ò yítà pókàta-dà n'òo bih̄anamá kpémú. ¹⁹ Kà yohokú yodá, men̄n̄ n'òo dapàm̄ma kà pá yèdi ye yotí meheká.

Weèdid̄ōpu nà dandaní kó neé p̄a-sa

²⁰ K'yé weka k̄ányè̄n̄fa, kà pá n'k̄ehedi é tantá ye k̄ankamú pesá, k'òo dapàm̄ma é n'h̄j̄ta mù kpéi pépédí háá nà mu c̄ènci. ²¹ Kà Píyèè é deñta mìi wontà p̄a-sa é caka Sès̄fì è yò: Dakp̄è̄n̄, wáñtá ye tepú a wontà n̄odáa-pu kà mù kpéi. ²² Kà Sès̄fì é pà t̄ená è yò: Ní n'dañ-nà Weèdi. ²³ Mós̄ma-dà n ne cakú-ma! Kà n'òoc̄j̄n̄ cakáa t̄ādi è h̄in̄: Yídá ye pesà é taá d̄odi dàmedì meheká, k'ò pú káá mamahàma o yàma meheká, àmá k'ò dan̄ è yáá è yò ò wedà-sa kó p̄a-ma, yè mèe baà kó p̄a-ma. ²⁴ Ye kú kpémú-dà tee n ne cakú-ma è tonà: Ne kó c̄h̄a-sa weñni ne weèdid̄ōpu meheká, né n'dañ è yò n'èè déta-á-ma, ne mèe k'èè déta-ma. ²⁵ Kà ne neèhi è p̄akú weèdid̄ōpu, è deñtá è yò ne káá màc̄mà n'òoc̄j̄n̄, kà né búta dàhàka ye yañn̄ s̄iima k'yé teha kà ne Báaa mèn̄n̄ péé-ko h̄in̄ka mèe té ne deèda ne s̄iima. [²⁶ Àmá, kà ne yení t̄òpa s̄iima dàhàka búta-pu, ne Báaa mèn̄n̄ péé-ko h̄in̄ka mèe té pú kó ne deèda ne kú s̄iima.]

Pà békú Sès̄fì o n̄òti péé-nà-sa-ní

²⁷ Ye kú dàhàka, kà pá t̄umá taá Sèdùsàdém̄. Pà tèi-má, k'ó dúú Weèdi h̄j̄ta meheká è cènti, kà d̄h̄àka kpém̄ma, nà Weèdi kpé̄nt̄in̄uka bih̄anapá, nà Sùwífupa yotí kpém̄ma é t̄eni o pesá. ²⁸ Kà pà t̄eni óò béka è yò: Wodà a p̄ej̄ n̄udi k'á p̄akú-nà ye kú ñi-ní? Wod'aa p̄ej̄ n̄udi k'á yè p̄akú? ²⁹ K'ó pà t̄ená è yò: N kó ne béka békama màc̄-dà. Kà ne n t̄ená n ne békú-sa, ye w̄oni n kó ne caka-á-ma mèn̄n̄ n p̄ej̄-kó n̄udi kà n p̄akú mi-ní. ³⁰ Wodà de t̄on-ní Ìs̄aà k'ò cómù? Weèdi-dà nkéè ñipa? N caka-nà-ní. ³¹ Ye w̄oni, kà pá n̄h̄inà pa c̄j̄di pesá, é caka pa t̄òpa è yò: Kà ti h̄in̄ Weèdi-d'òò t̄on-ní, ò kó ti béka-á-ma è yò: Baà tee kà ti pú teháa o wemá? ³² Kà ti mèe t̄ená è h̄in̄: Ñipa-

d'òò tòn-ní, heì!... (Pà de wani nìku-dà, mìl tee-sá ku weñni de yáá-ma è yò Ìsáà de yòn Weèdi weténáko mónn-dà.)³³ Memá-dà kà pá téná Sèsfì è yò: Ti pú yáá. Ye wòni, k'ó pà caka è yò: Kà memá-dà, mmí mèe té pú kó ne caka mènèn n̄ p̄i-kó nùdi kà n m'pakú mìl-ní.

12

Webemú yohènamá nà tontòm̄ma

¹ Ye kú dàhàka, kà Sèsfì é cetá è pà cakú webemú yohènamá. K'ò yò: Nii òc̄j̄n-dà híúwà o yèdi p̄èèc̄nà, é maá maafá é nì yéntá, é t̄j̄ ò kó n'níp̄u-ku kú meheká o tebíiká, é yí maá yèdi ceípa c̄n̄c̄ni deudí. Ò yò-má miyá, é peha tontòm̄ma é nì pà ceá è yò kà tebíiká biù kà pá n'tookú, ye wòni é kahá c̄n̄ku. ² P̄èèc̄nà bii t̄j̄n daadí, k'ó tòn o dapàn̄n òc̄j̄ ye yèdi tontòm̄ma pesá, è yò p'òò k̄j̄-ní o kú tebíiká. ³ K'yèe dapàn̄n é t̄i, kà p'òò c̄c̄j̄ óò podí, óò b̄hà-ní o n̄òkpehí. ⁴ K'yèe yèdi yañ̄n é t̄j̄má tòn pa pesá o dapàn̄n t̄òò. K'ó t̄i kà pá b̄dí o yuudí, óò t̄è-nà. ⁵ K'ó t̄j̄má tòn o dapàn̄n t̄áko, k'ó t̄i kà p'òò k̄ù. Ye kú dàhàka, kà pá mà h̄in o dapàn̄m̄ma t̄òpa d̄óódi ò de tòn-pá, é podí p̄àc̄j̄, é k̄ù t̄òpa. ⁶ Ye yèdi yañ̄n bíitá c̄j̄di-dà de ò s̄j̄ntà-nà, k'ò t̄à d̄óó sukú. K'ó t̄à tòn d̄ènd̄ema pa pesá è màhu è tonà: Pà kó wampa-á-ma n bíitá. ⁷ K'yèe yèdi tontòm̄ma m̄e caka pa t̄òpa è yò: N̄te-nà mènèn kó wántá kp̄aa-kó ye yèdi. Héé-nà kà t'òò k̄ù, k'yé teha kà ní h̄in ti kp̄eédí. ⁸ Kà pá c̄c̄j̄ ye bíitá é t̄à k̄ù, é t̄à tódá é t̄à w̄í ye yèdi béékú. ⁹ K'ó pà béka ye wòni è yò: Toò, nté yèdi yañ̄n kó h̄imà ye wòni? Ò kó t̄èni-í-ma-ní, é héé kà pá k̄ù ye tontòm̄ma, ye wòni k'ó peha t̄òpa é nì pà ceá. ¹⁰ Ne pú kaàn Weèdi wemá meheká kà pá yò:

T̄áàdi maápa de w̄í-dí,

mení-dà tón é h̄in t̄áàdi mèn̄n púsí-di n̄m̄n̄ni kp̄ekpekamá sukú.

¹¹ Bateó-dà p̄anà ye kú p̄ám̄a,

kà mà yòn̄n p̄ás̄ama ti yìh̄ika.

¹² K'yèe Sùwífùpa kp̄ém̄ma é peha pà kó h̄imá óò c̄c̄dí, è h̄á wani nìku. Pà de bantà-á-ma è yò Sèsfì de an̄i mem̄pá-dà n'èe webemù yohènamà. Kà pá yídá é kahá óò hédá.

Dàm̄pòò bodáma H̄òdóm̄u wódo Sèsáà

¹³ Kà pá tòn-ní Sèsfì pesá Fàdísipa p̄àc̄j̄, nà Èdóti kp̄eepá è yò pá t̄èni óò díh̄ina wemá kó yetá kà p'òò c̄c̄dí. ¹⁴ Kà pá t̄èni óò caka è yò: Dakp̄èñ̄n, ti yáá-ma è yò a cakú móma-dà. A m̄e pú wani òc̄j̄n bá k'ò d̄óó k'ó n'yòm̄pu. Àmá, a bih̄on̄i nido yònà é n'fòùkaàma-dà Weèdi còku meheká. H̄ákà, yè suu-ú-dà tí m'bopù dàm̄pòò H̄òdóm̄u wódo, nk̄èè ti dá m'bopù? ¹⁵ Sèsfì h̄á de yáá-ma pà de màhu-sá pa yàma meheká. K'ó pà téná è yò: Badà tee kà ne n beñ? N yaà-nà-ní díimáadi n̄ic̄j̄ ká n nì déhá. ¹⁶ Kà p'òò t̄èni n̄ic̄j̄, k'ó pà béka è yò: Woò tee dikù mèn̄kù dàdi-kù, nà yèdi mèn̄n p̄éè-dì ni h̄ínkà? Kà p'òò téná è yò: H̄òdóm̄u wódo-dà. ¹⁷ Ye wòni k'ó pà caka è yò: K̄j̄-nà H̄òdóm̄u wódo mìl yòn̄-sa o kp̄eésá, é k̄j̄ Weèdi mìl m̄e té yòn̄-sa ni kp̄eésá. K'yé pà dii dédéí n'òò de pá t̄énkàama.

Békama kp̄ípa yántáma h̄ínka

¹⁸ Kà Sàdúkìpa, nìpa mèm̀pà pú dań-pa è yò kpíípa kó wáńtá yáńtá, kà pa pàc̣j é t̀eni Sèsî pesá, óò béka è yò: ¹⁹ Dakp̀ènn, nte kp̀ènti nùdi M̀yìsì ti ḳj̣-di, ò yò: Kà nido pú káá-nà o poòo bída è kpíi, o yańn-dà yòna è h̀òta o poòo, óò peé-nà bíhí k'yé teha k'òo f̀udi dá fédí. ²⁰ Nte hákà kà nìi p̀ayehi de péé, è yòh kúcàpa. Kà P̀ò è kádá poòo é kpíi è pú pedà bída. ²¹ Kà Sàbí é h̀òta o poòo, è mèe té kpíi è p'òò peé-nà bída. K'yèe kú nìiyà é pańá nà taáko. ²² K'yé ṣkatá mema kà pá kpíi pa yehika p'òòc̣j̣h p'òò peé-nà bída. Pà kpíi-má pa weńni mema, k'yèe poòo mèe té tùna é kpíi. ²³ Kpíípa kó yáńtá ṭín daadí, pa yehikà mehekà, ò kó n'yòh pa wodà kú poòo-dà, è yáá pa weńni de ò kádà-á-dà-ma? ²⁴ Kà Sèsî é pa t̀ená è yò: Nte-nà mìi tee-sá kà ne péé yetáma meheká: Ne pú yáá Weèdi wemá, ne mèe pú ṭímà yáá Weèdi kpeèti sápu. ²⁵ Kpíípa kó yáńtá ṭín daadí, daapá koò pú kó kádá poòpa, poòpa mèe koò pú kó yan daapá, àmá pa kó n'yòh Weèdi t̀ont̀ondipá yòmpu-dà ḥínka meheká. ²⁶ Mìi héé-sa kpíípa yáńtáma wemá, ne pú kaàn M̀yìsì p̀kàta meheká, Weèdi de ò ḥimpú túku m̀ènkù de c̀hú-ku hamú è há pú yon ku pesá-a? Weèdi de yò: N yòh Àbààhám, nà Ìsáákì, nà Sàkópù Weèdi-dàⁿ. ²⁷ Weèdi pú yòh kpíípa Weèdi, nì yòh mèm̀pà f̀òu-pa Weèdi-dà. Ne yetáma péé-sa-dà dédí.

Kp̀ènti nùdi m̀èni h̀atà-di t̀òka

²⁸ Ye de h̀j̀ta kp̀èntinùka bihànakó òc̣j̣h-dà yè péé, é yekà ǹǹhici pá de toó-cí, nà Sèsî de t̀éńkáama kú bookú Sàdúkìpa k'yè coó. K'òò pàdi-ho, óò béka è yò: Kp̀ènti nùka weńni meheká, m̀m̀óni-dà héé yudí? ²⁹ Kà Sèsî óò t̀ená è yò: Nte m̀èni yòh-di yudí: Ìsìdàyédìpa-nà, besì-nà é yekà sukú! Weèdi ti Bateó yòh Bateó òc̣j̣h-dà p̀p̀p̀. ³⁰ A yòh è n'̀d̀sì Weèdi a Bateó n'̀aa yàma weńni-dà, n'̀aa sèdi weńni, n'̀aa yańm̀hàdi weńni, n'̀aa kpeèti weńni. ³¹ Nte kp̀ènti nùdi t̀òdi m̀èni nì t̀un-dí-ní: Á n'̀d̀sì a t̀òò é n'yòh a m̀ónn. Kp̀ènti nùdi nìc̣j̣h koò pú péé è h̀atà menkà ka déèkà. ³² K'yèe kp̀èntinùka bihànakó óò caka è yò: Yè sudi dakp̀ènn! A cakáa m̀óma-dà è yò Weèdi yòh nìc̣j̣h-dà, meni bààsì t̀òdi koò kó. ³³ Kà nìi nì d̀sì n'̀òò yàma weńni, n'̀òò yańm̀hàdi weńni, n'̀òò kpeèti weńni, è ṭímà d̀sì o t̀òò è yòh a m̀ónn, yè h̀atà-á-ma ǹpeéd̀h̀di a kó paá-di Weèdi kpémú, nà d̀h̀ka t̀òka weńni. ³⁴ Sèsî h̀j̀ta-ma ò màhaà dédí é neé t̀ená, k'òò caka è yò: A pú ðeu-nà aa dúú-ma Weèdi wòti meheká. Ye kú dàhàka, òc̣j̣h de koò pú teháa é pádá kunǹnfa óò béka màc̣j̣mà.

Dàfìti nà Kídìsì pà yòmpu

³⁵ Kà Sèsî é toó wemá è pa bihàni Weèdi h̀j̀ta meheká, ye wòni é pa béka è yò: Nte kp̀èntinùka bihànapá kó ḥimà é n'yò Kídìsì^o yòh Dàfìti yaàbíídì-dà ṣáádi? ³⁶ Seewendí de s̀unà-ma Dàfìti, k'òò m̀ónn-dà é wedá è yò: Bateó Weèdi cakáa n Teó è yò: Yańí é kaadi n hiòma, háá é n'sàna n kó héé-ma k'á cèn a k̀àt̀òpa ḥínka. ³⁷ Dàfìti m̀ónn-dà de ò yíi è yò o Teó. Nte yè kó ḥimà, k'ó ṭímá é n'yòh-nà Dàfìti yaàbíídì? Nìku d̀s̀di-dà de ò besì k'yè kú nadi sàma.

Sèsî cakú nìpa è yò pá paá ỳkàma nà kp̀èntinùka bihànapá.

n 12:26 Dentá Núntiyèèma 3:5

o 12:35 Dentá dùúki 3:15

³⁸ Ò de pà cakú o bihànamá meheká è tonà: Né paá yòkàma nà kpéńtínùka bihànapá. Pà naanà é báá tókedeutí-dà é n'centi peetamá bèmbèka meheká, kà pà pà cùnì, è pà danti. ³⁹ Pà naanà kaàceceká-dà Weèdi wemá bihà-nàmòka meheká, nà dikàdikú pesá. ⁴⁰ Mempa-dà fèùdi kpíipoòti káá-sa weñni, àá té tódá wòni sàma é n'doń Weèdi è kpèi pá pà yíi niicoópa. Pa kú toòka yómma kó wántá haťa-ma toòpa kpéema.

Kpíipoòku kùcòkù paadí

⁴¹ Kà Sèsí é taá kaadi è coó-nà pà de tanì-sa díci Weèdi hýta meheká, è cóti nipa de cì tánkumá kú bookú. Kà kápa dódidi tanì díci sàma. ⁴² Kà kpíipoòku kùcòkù, kà kù yòn péita, é tèni é taàa díimáámú mùdéé kà mù pú tèi yècñi. ⁴³ Kà Sèsí é yíi o dapàmma é pà caka è yò: Móma-dà n ne cakú-ma. Kpíipookù péikù, menku tàà-fà dífà, fà haťa-á-ma toòpa weñni kpéci, ⁴⁴ mì tee-sá mempa pa wenni, pà tàà díci pà de pú keèhi-cí-dà pa díisàci hínka. Àmá menku, nà kù baà yòn-sà péita, kù tàà kù de káá-fa weñni-dà è kó n'fòu-nà.

13

Sèsí cakú Weèdi hýta pódáma wemá

¹ Sèsí yèti tñ wòni Weèdi hýta meheká, k'òo dapànn òcò óò caka è yò: Dakpénn, wántá pà maá-nà-ka táàka Weèdi hýta suukú sápu. Códí pà tà madí kà ta wehimú sápu. ² Kà Sèsí óò téná è yò: A dii ta maáma wehimú sápu-iì? Ta táàdi nìcòni pú kó sýntá é n'còmú ni toòdi hínka. Ye wenni kó wántá é wuùdi-í-ma-ní teńka.

Mì kó tèni-sá-ní teńka hínka nà Sèsí dapàmma hínka

³ Ye kú dàhàka, kà Sèsí é taá é kaadi òdífuna táàdi hínka, è coó-nà ye Weèdi hýta. Kà Píyéè, nà Sàákì, nà Ísáà nà Àntidèè óò béka pa cýdi pesá è yò: ⁴ Ti caka ye kú niì kó paá tñ daadí, nà yídó mènè kó ti beka-kó wòni yè kó tèni-dí-ní. ⁵ Kà Sèsí é pà caka ye wòni è yò: Paá-nà yòkàma, ne dá teha kà niì é ne yehèna. ⁶ Nipa dódidi pení-ma-ní nà n yèdi, è kó tèni é m'bańtí è tonà: Mempa-dà héé Weèdi takadáko, è mèè é yehèna nipa sàma. ⁷ Ne kó n'you tñ daadí kà nipa tñ taàna yoo kà pà toò taàna kó pańá, wantafñdi dá ne cèè. Yè békú ye kú niyà é tèni-í-ma-ní, hákà yè mum pú kó n'yòn fòuku yòmá. ⁸ Bookú kó yíi-ma é dodi ku tókú taàpu, kà wóoteńka é yíi dodi ka toòka taàpu. Teńka sampàma-dà kó paá páati tìcò kú meheká, kà kòka é dúni. Yè kó n'yònà podò hý n'kó pedá kà dñkú mènèkù óò cetá-ku-dà. ⁹ Néna mèekà, né n'yáá ne cýdi kpémú. Pà kó wántá ne fuupa-á-ma sídàma nàmòka meheká, é ne podí Weèdi wemá bihà-nàmòka meheká. Pà kó ne tanà-á-ma yotí kpémma yìhika, nà wóopa yìhika nà mmí kú kpémú, kà né pà caka n wemá. ¹⁰ Yè békú pá denà é caka boocí weñni-dà Weèdi wenaamá. ¹¹ Pà kó ne cèè tñ wòni é ne n'kódí-nà sídàma nàmòka meheká, ne yàma dá n'kantì nà ne kó taá wedá-sa. Né tèi é wedá wemá Weèdi kó ne kýma ye kú wòni, mì tee-sá mà pú kó m'péé-nà-ní ne pesá, àmá Seèsuudi pesá-dà. ¹² Nipa kó wántá ye-é-ma pa kúcàpa kà pá pà kòu, kà báàpa mèè té mà hìn pa bíhí, é yídá kà bíhí sijkà hi báàpa hínka é héé kà pá pà kòu. ¹³ Nipa weñni kó ne n'sèè-ma nà mmí kú kpémú. Mènè há kó paá-ko wéèma háá é deeta, mení-dà kó déta fítáma.

Sòkací paáma mèmà kó tènì-má-ní

¹⁴ Ne kó déhá t́ín daadí sòkací mènì kó t̀è-ci-ní f̀éúdáma kà cì péé cì de pú yònà é m'péé-sa, (mènèn kàn-ko ye kú niyà yònà é yekà-á-ma sukú yè ò cakú-sa). Mèm̀pà kó m'péé-pa Sùdèè teńka meheká yònà é cocí-ma é disì taàka híńka. ¹⁵ K'yè h́t̀ta mènèn péé-ko o nàm̀ni m̀m̀m̀nti híńka, ò koò dá cútá ni meheká è kpèi é tódá yèc̀fi é neé cocí. ¹⁶ K'yè mèe h́t̀ta mènèn péé-ko yèdi meheká, ò koò dá kòn h́t̀ta é tódá o tókesàdi. ¹⁷ Yè kó n'yòn nánkú sàku-dà poòpa mèm̀pà kó m'pón-pa ye kú daàka meheká, nà mèm̀pà kó n'yò̀di-pá. ¹⁸ Né c̀hà Weèdi k'yèe kú niyà dá yetá é tènì yò̀di meheká, ¹⁹ mì tee-sá, ye daakà kó n'yòn wèéwèdo daàka-dà dédéí. Ye kú wèéwèdo pú kó n'sáà-nà t̀òò òc̀n, é tódá nà f̀òuku cetáma kà Weèdi é paá niyà weńni háá nà yenì, o t̀òò mèe koò pú kaá è pení. ²⁰ Kà Bateó múntà de pú yakàdà ye daakà, òc̀n de pú kó f̀t̀á. Àmá, ò kà yàkàdà, nìpa ò taakàdà-pa kpémú-dà kà pà yòn o kpéepá. ²¹ Kà nì ne cakáà ye ẁni è híń: Kídísì péé mì yoo ò péé menkà, ne dá taà dandaní ò hímpú, ²² mì tee-sá, niìkpàkpàpa kó wántá tènì-í-ma-ní é báńta nìpa è yò pà yòn Kídísìpa-dà, kà t̀òpa yò pà yòn Weèdi wetéńápa-dà. Pà kó paá-ma yípa, nà póńta paáma è kpèi k'yè kó teha, kà pá yehèna Weèdi taakàdà-pa. ²³ Néna m̀ekà, né n'casì ne c̀òdi híńka. N ne cakáà-á-dà ye weńni k'yè mum pú tènì.

Niifòuò bíitá tómma-ní

²⁴ Àmá ye daàka meheká, k'yèe wèéwèdo kahà, wèńku kó biikà-á-ma, c̀ma mèe koò pú kó k̀j ma wenkú. ²⁵ H̀hi kó n'dòò-ó-ma-ní nà híńka, kà nòti^p mèǹti púsí-ti mì péé-sa weńni híńka é sampà. ²⁶ Ye ẁni-dà pà kó déhá-ma Niifòuò bíitá kà tá foó-ní wòka meheká, nà nòti sàti, nà wehimú. ²⁷ Ye daadí, tà kó t̀n-ń-ma Weèdi t̀nt̀ndipá teńka nà ka nùdi, kà pá t́káná Weèdi taakàdà-pa bá kà pà péé-sa.

Biçhànamá kankamú ti k̀ni-ma

²⁸ Né c̀dí é yekà sukú biçhànamá fik̀yèe tepú k̀ni-ma. Kà mu d̀ecí ỳa p̀ntapú, kà fàti p̀ntà, ne yáá-ma ye ẁni è yò bíhidí-dà t̀sí. ²⁹ Ma c̀òdi-dà m̀etékà, kà ne déhá t́ín daadí k'yèe kú niyà tènì, kà né n'yáá è yò Niifòuò bíitá tèm̀má t̀sí-ma kà tà d̀si háńnùdi. ³⁰ Ḿmasí-dà n ne cakú-ma, ẁnkù menkú kú nìpa pú kó kpí pa weńni, k'yèe kú ni weńni mum pú tènì. ³¹ H́ńka nà teńka kó yòò-ó-ma, àmá n wemá pú kó yòò daadí yènì.

Weèdi c̀òdi-dà yáá Teó kó tóní t́ín daadí

³² M̀ekà, mì héé-sa daadí nà ẁni tà kó tènì-dí-ní, òc̀n p'èè yáá. Bá Weèdi t̀nt̀ndipá mèm̀pà péé-pa híńka nà ni Bíitá m̀ntá p'èè yáá, Báàa c̀òdi bààsì. ³³ Paá-nà yòkama! Né n'you ne dá n'dòó, mì tee-sá ne pú yáá ye ẁni pení t́ín daadí. ³⁴ Yè kó n'yònà d̀òò òc̀n k̀dí-ma-dà c̀ńku, é k̀j o dehàpa kpènti o h́t̀ta híńka, bá mènèn d̀è-ko n'ò t̀mú. K'ó yí caka mènèn ceí-ko o h́t̀ta háńnùdi è yò ó n'you ò dá d̀ó. ³⁵ Ye kpémú, né n'you ne dá n'dòó, mì tee-sá ne pú yáá h́t̀ta yań kó koní t́ín ẁni. K'yèe púdí yè kó n'yòn yohokú-dà yoo yènkàc̀hòka, yoo kóok̀ncí yoo kányèńfa.

³⁶ Né dá teha k'ó koní é tèni é ne séntá kà ne d'ó. ³⁷ N ne cakú-sà-ní, n yè cakú nìpa weñni-dà: Né n'you ne dá n'd'ó.

14

Dòhàka kpémma penti pà kó hìmá é kòu Sèsî

¹ Núntiyèèma kúúdi, nà pèèpa mèm̀pà k'ó-pa yòmu yíkànasá kpéedí-dà de yònà é paná daàa kàdée meheká. Kà dòhàka kpémma, nà Weedi kpéntinùka biòhànapá penti pà kó hìmpú é cèè Sèsî nà seúma óò kòu. ² Kà pá caka pa t'òpa è yò: Ti dá ò cèè kúúdi meheká, k'yé teha kà nìku dá yee o kpémú é paà hodí.

Poòò òc'òh hùtá t'udàdé Sèsî yudí hìnká

³ Sèsî de péé Bètànî y'otí meheká-dà nìdo òc'òh kú h'òta kà p'òò toò Sìm'òò k'òh. Pà kàdi t'ín w'òni è yon, kà poòò òc'òh é dúú-ní è toó-ní dénta, kà t'udàdé díikpecí k'óò s'ùnà ta meheká. Ye t'udàdé, pà de ò paà nà tesá pà toò-sa-dà nàadi. K'ó p'ódá ye dénta f'òkú, é hùtá ye t'udàdé Sèsî yudí hìnká. ⁴ K'yé d'ònka p'òc'ò mèm̀pà de péé-pa ye pesá, kà pà békú pa t'òpa è tonà: Badà tee k'ó c'ò-c'òha ye t'udàdé-ní? ⁵ Ti de kó neé-ma óò yèda k'yé h'atá weñt'ínká k'òh nà t'aa t'omú dífa, kà tí totá s'òmma. Kà pá k'èi-nà ye poòò sàma. ⁶ Àmá, kà Sèsî yò: Ò héé-nà y'òkàma. Badà tee kà n'òò kpàà n'òò kpécí? Ò paà-sa n hìnká suu-í-ma. ⁷ S'òmma m'empa baà kó ne m'péé-nà-á-dà. Ne kó neé-ma é pà paná suumá ne kpèi t'ín w'òni, àmá mmí n pú kó ne m'péé-nà w'òka weñni. ⁸ Ò paà ò kó neé paà-sa-dà. Ò denà é siidi t'udàdé n w'òhku n dánáma kpémú-dà. ⁹ N ne cakú m'òma-dà, pà kó caka-sá weñni Weedi wemá teñka nà ka n'udi, pà kó caka-á-ma ye poòò paà-sa é deñta o kpémú.

Sùdásì kpèi é yee-nà Sèsî dòhàka ya'mma

¹⁰ K'yòò t'ònt'òndipá p'í-p'adée meheká, k'òòc'ò yídá, kà p'òò tonà Sùdásì Ìsikàdiy'òti, é taá é déhá dòhàka ya'mma kpémma è yò ò kó pà yee-nà Sèsî. ¹¹ Pà yèkaà-ma mema, k'yé pà naaka sàma kà pà yò pà k'òò bodá díci. Memá-dà k'ò ní m'penti còku ò kó yèè-ku é yó ò t'aa-nà pa n'òhi meheká.

Sèsî yon núntiyèèma kúúdi dipú n'òò dapàmma

¹² Pèèpa mèm̀pà k'ó-pa yòmu yíkànasá kúúdi dacecedí, daadí pà h'ò kòu-di h'òb'íiká núntiyèèma kúúdi dipú kpémú, kà Sèsî dapàmma óò béka è yò: A kpèi tí taá ya-dà áa b'éná núntiyèèma kúúdi dipú? ¹³ Ye w'òni, k'ó t'òn o dapàmma p'adée é pà caka è yò: Taá-nà y'otí meheká, ne kó t'èi peèta-nà-á-ma nìdo k'ò toó c'òta nà néemá. N'òò t'una, ¹⁴ k'ò t'èi è dúú-sa, kà né t'una é dúú é caka ye h'òta ya'n è yò: Dakp'ènn békú è yò: Nàm'òni m'òni kú meheká-dà n kó dii-má núntiyèèma kúúdi dipú nà n dapàmma? ¹⁵ Ò kó ne beka-á-ma nàm'ònsàdi ye h'òta hìnká kà pà nì d'òhaà é yòò nà neñti yè békú-ti. Ye pesá-dà ne kó mù ti b'éná-ma. ¹⁶ K'yèè dapàmma é yídá kahá y'otí meheká, é t'èi é déhá ye weñni é n'y'ònà ò de yè pà cakáama. Kà pá b'éná ye núntiyèèma kúúdi dipú.

¹⁷ Kà yohokú é yodá, k'ó t'èni n'èe t'ònt'òndipá p'í-p'adée. ¹⁸ Pà kàdi t'ín w'òni è yon, k'ò yò: N ne cakú m'òma-dà, néna mèm̀pà péè n yon-nà-pà, n'òòc'ò-dà kó n yèda. ¹⁹ K'yè o t'ònt'òndipá yàma yò k'ò, kà p'òò m'békú òc'ò òc'ò è toò: Mmí pú deè nkéè?

²⁰ K'ó pà téná è yò: Ne pfi-pàdée mehekà n'òcɔ̀-à, nà mènè ti péè è bɔ̀n-kò caadi, mení-dà.
²¹ Niifòò bíítá kó kpíi-ma é n'yònà pà wàtà-sa ta hí̃nka Weèdi wemá meheká. Àmá, nánkú-dà kó m'pée-nà nido mènè kó tà yeda-kó. Kà pà de cemà pú pedà ye yàn, ye kpéemá tɔ̀.

Núntiyèema kúúdi dipú

²² Pà yon tɔ̀n wòni, kà Sèsí é tódá pɛ̀é é seda Weèdi, óò wéha, óò pà kɔ̀ɔ̀, è yò: Nto-nà, miì yòn n wò̀nku-dà. ²³ Ye kú dàhàka, k'ó tódá bondadí nà difɛ̀é, é seda Weèdi, óò pà kɔ̀ɔ̀ kà pá nì pa wènni. ²⁴ K'ó pà caka è yò: Miì yòn n hí̃ma-dà, Weèdi ne pakú-nà-ma múnápàmma, kà mà kó wudí niku dósdi kpémú. ²⁵ Móma-dà n ne cakú-ma, n koò pú kó nì difɛ̀é háá é n'sàna daadí n kó tùmá nì-di pànn Weèdi wò̀ti meheká. ²⁶ Ye kú dàhàka, kà pá deen Weèdi duntàma néyè̀nci, é yò è yèè é disì òdífuna tɔ̀di hí̃nka.

Sèsí cakú è yò Píyèè kó nòhì è yò ò p'òò yáá

²⁷ K'ó caka o dapàmma è yò: Ne kó n wéi-ma é cocí ne wenni, miì tee-sá, pà wàtà Weèdi pòkàta meheká è yò: N kó kò̀-ú-ma hɔ̀cɛ̀nto, kà hɔ̀ci é wiida ci békà békà. ²⁸ Àmá, kà n yá̀ntà tɔ̀n daadí, n kó nihí Kàdidèè-dà é taá ne n'ceí. ²⁹ Kà Píyèè óò caka è yò: kà tòpa wènni a wéi mmí pú k'áa wéi. ³⁰ Kà Sèsí óò téná è yò: M'a cakú móma-dà, yenì kú yè̀nkà menkà, kà kótadá é neé kò̀n còku madéé, a kó nòhì è yò a pú n yáá còku màtɔ̀-à. ³¹ Kà Píyèè é tùmá yeda pépédí è yò: Fóú! N pú kó nòhì daadí yenì è yò n p'áa yáá, bá kà pà kó péé n kò̀n nà fɔ̀n. K'òo dapàmma tòpa mèe té téná-hɔ̀ mema cɔ̀di.

Sèsí dɔ̀n Weèdi Sètisèmanéè meheká

³² Ye kú dàhàka, kà pá tadí bèmbèni pà toò-di Sètisèmanéè^q, é tèi k'ó caka o dapàmma è yò: Ní n'kaadi-nà miì kà n taá é dɔ̀wa Weèdi.

³³ K'ó tódá Píyèè, nà Sàákì nà Ísàà kà pá nɔ̀dá. K'òo bòti é cetá è pùdi dédéí, k'òo yàma é cɔ̀ha.

³⁴ K'ó pà caka è yò: N yàma-dà cɔ̀háà dédéí k'yè n yùhù-nà è yònà kúmú. Cántá-nà miì, né n'you, ne dá dɔ̀.

³⁵ K'ó tuùta-ho yìhika cɛ̀ma, é wéi-ho o cɔ̀di tenka, é cɔ̀hà Weèdi è yò, k'yè kó teha k'yèe nánkù wò̀ni menì óò nátá-nà. ³⁶ Ò de tonà: Ó n báa, a pú kó hɛ̀ka yecɛ̀é kú paápu. N nàhina ye nánkù bondidì menì. Hákà, a dá héé kà n kú dókàma é paná, àmá a kpéemá.

³⁷ Ye kú dàhàka, k'ó tóní o dapàmma pa tɔ̀ka béka, é tènì è hɔ̀tà pà dɔ̀. K'ó béka Píyèè è yò: Sìmòò, a dɔ̀-ma? A pú nedà é n'you bá máàku kùcɔ̀? ³⁸ Né n'you, é n'cò̀hu Weèdi k'yé teha kà ne dá dɔ̀di beímma meheká. Nido sèdi hɔ̀ n'kpèi-í-ma é paá suumá, àmá o wò̀nku pú kpenì.

³⁹ K'ó tùmá nátá , é cɔ̀hà Weèdi ye wenòka ka cɔ̀di hí̃nka. ⁴⁰ K'ó tùmá tóní é tènì é n'hɔ̀tà pà tùmá dɔ̀, miì tee-sá nùndɔ̀mu-dà de pà sèdà dédéí, pà koò pú kó neé diida. Pà de koò pú yáá pà k'òò téná è yòpu.

⁴¹ K'ó tón taama é tóní é tēni é pà caka è yò: Ne dój-me-è è muhipú-ì! Yè yò-ó-ma. Wòni-dà tēni kà pà kó taàa Niifòuò bíitá niisimma nòhi meheká. ⁴² Yídá-nà kà tí kahá! Nte kà mēnēn kó n yeda-kó tēni.

Sèsî cǝǝma

⁴³ Sèsî de káa wèi-í-ma kà Sùdási, y'oo tontondipá pîi-pàdée meheká p'òocǝ, k'ó tēni è nò-à-ní niku dójdi kà kù toó sepeǝká nà yaí. Dòhàka yaamma kpémma, nà Weèdi kpéntinùka bihànapá, nà yotí kpémma, dà de pà tōn-ní. ⁴⁴ Sùdási, mēnēn de kó yedá-kó Sèsî de pà yò cakupù-dà yidó ò kó paǝ-ko kà p'òò bantá. Ò de yò: Nido n kó bàsi-nà-ko, mení-dà ne penti-má. N'òò cǝdí sukú òò kahá-nà. ⁴⁵ K'ó tēni é cemá pàdi-ho Sèsî, òò caka è yò: Dakpénn! È mēe òò bàsi-nà. ⁴⁶ Ye wòni, kà tòpa é kahá-ní é tēni òò cǝdí. ⁴⁷ Kà mēmpà de péé-pa ye pesá, p'òocǝ é nòta-ní o sepeǝdí, é potá dòhàka kpénn dapànn òcǝ, é fiita-ho o toodí. ⁴⁸ Kà Sèsî é pà béka è yò: Ne yòna é tēni n cǝǝpu nà sepeǝká-dà nà yaatí k'yè yòna n yòn-ma niikòudo? ⁴⁹ N de ne péé-nà-á-ma daàka wēnni Weèdi hǝǝta meheká è bihàni bá ne pú n cǝdí, àmá ye kú ni tēni è kpèi Weèdi pòkàhi wedà-sa-dà é paná.

⁵⁰ Ye wòni, k'òo dapàmma wēnni òò wéi é co-cocí. ⁵¹ Kà dapàmbitá tàcǝtà d'òò tūn è kǝú kùdáaku cǝǝdi. Kà pá n'kpèi tà cǝdí, ⁵² kà tá wéi ye kùdáaku é cocí ta kpeèdi.

Pà tanà Sèsî sídàpa yìhika

⁵³ Kà pá tanà Sèsî dòhàka kpénn hǝǝta, kà dòhàka yaamma kpémma wēnni, nà yotí kú kpémma, nà Weèdi kpéntinùka bihànapá èè pèta. ⁵⁴ Kà Píyéè ò tūn nà deuma háá-nà dòhàka kpénn hǝǝta mùnku meheká-ho. K'ó tēi é péé-nà mēmpà tà ceí-pa é kaadi è hađi hamú.

⁵⁵ Kà dòhàka yaamma kpémma nà sídàpa tòpa wēnni penti naadí è kó púǝ Sèsî k'yè teha kà p'òò kòò. Àmá, pà pú dètá, ⁵⁶ mì tee-sá nipa dójdi-dà de cakú nuñhetí o hínka, àmá tìcǝtí de pú bòn-nà ti tǝtí. ⁵⁷ Ye wòni, kà pàcǝ é yíí-ní é caka nuñhetí o hínka è yò: ⁵⁸ Ti yeekaà k'òò yò ò kó pódá-ma nìpà maá-tà Weèdi hǝǝta mentà, daàa kàtaǝ meheká é maá tòta, nìpà pú kó m'maá-ta.

⁵⁹ Àmá, bá nà mema, pà pú yeekaà pa tòpa. ⁶⁰ Ye wòni, kà dòhàka kpénn é yídá pa wēnni yìhika, òò béka è yò: Aá pú tēni màcǝm'èè? A pú you pà wèi-sa a hínka? ⁶¹ Àmá, k'òò baà yòn wám ò pú tēni màcǝmà. Kà dòhàka kpénn é tùm'òò béka è yò: Fún-dà yòn Weèdi takadáko, Weèdi ti duñti-dí kú bíitá? ⁶² Kà Sèsî òò téná è yò: Ʋù, n tà yòn-í-ma. Ne kó wántá déhá-ma Niifòuò bíitá kà tà kàdi Weèdi nòti wēnni kpéedí nòkànhiòma. Ne kó tùmá tà déhá-ma kà tà pení hínka wòka còhàka.

⁶³ Ye wòni, k'yèe dòhàka yaamma kpénn é cétá o báatí, mì bekú-sa è yò y'òò donkàa. K'òò yò: Yè koò pú ti bekú-ma pútápà! ⁶⁴ Ne yeekaà-á-dà-ma k'òò tēu Weèdi. Ne maàhu mómnyà-dà? Kà pa wēnni òò kǝǝ yetádi è yò ò yòna é kpíí-ma. ⁶⁵ Pa meheká, kà pàcǝ cetá è tìhú nuñtǝtí o hínka. Kà pá bowá o yìhika, òò podí nàwǝǝka è t'òò béka è yò: Bantá mēnēn àà potà-ko. Kà Weèdi hǝǝta ceepá òò tódá òò podí wenci.

Píyéè nòhì è yò ò pú yáǝ Sèsî

⁶⁶ Píyèè de káà péé f̣di-dà mùnku meheká, kà ḍhàka yaɔmma kp̣ènn podeho òc̣j é ṭeni, ⁶⁷ é déhá Píyèè k'ò ḥadi ḥamú. K'òò wántá sukú, òò caka è yò: F̣j̣n̄, a ṃèè té de péé-nà-á-dà Sèṣi Nàsàḍéti kóóó. ⁶⁸ K'ò n̄h̄i è yò: N pú yáá. N pú yeèkaà a kp̣èi é n'yòpu. Ye kú dàhàka, k'ò yídá mùnku é kahá é taá dúú nahàku meheká, kà kótadá é ḳon̄. ⁶⁹ K'yèè númpodeho é ṭúm'òò déhá é caka ṃèmpà de yè péé-pa è yò: Ḍoòò ṃenn̄ yòh̄ pa kóóó òc̣j-dà. ⁷⁰ Kà Píyèè é ṭúmá n̄h̄i. K'yé ṭh̄èna-ní c̣éma, kà ṃèmpà de yè péé-pa é ṭúmá caka Píyèè è yò: F̣j̣n̄, m̄omasí a ṃèè té yòh̄ pa kóóó-dà mìi tee-sá, a yòh̄ Kàḍiḍéè yañn-dà. ⁷¹ Kà Píyèè é w̄eha è yò: Kà n bántáà, kà Weèdi é ỵj̣n̄ n todí. N pú yáá ye ḍoòò ne wei-kò kú wemà. ⁷² Ye pesá n'èè pesá, kà kótadá é ḳon̄ déèma. Ye wòni k'ò deñta-ní Sèṣi d'òò cakaà-ma è yò ò kó n̄h̄i còku màṭaḡa-dà è yò ò p'òò yáá kà kótadá é neé ḳon̄ déèma. Memá-dà k'ò cemá potá dawòni.

15

Pà tanà Sèṣi Pidátì pesá

¹ Ḳányèñfa p̣ìp̣idì, kà ḍhàka yaɔmma kp̣èmma é paḡ peètamá nà yotí kp̣èmma nà Weèdi kp̣ènṭin̄uka bih̄anapá nà sídapa weñni è kp̣èi é tódá ṭakadáma. Kà pá hédá kà pá dákáná Sèṣi, òò tódá é taá òò ḳj̣j̣ Pidátì^r. ² Kà Pidátì òò béka è yò: A yòh̄ Sùwíf̣upa wódo-da-à? K'òò ṭéna è yò: A m̄on̄n̄ mà wedà.

³ Kà ḍhàka yaɔmma kp̣èmma é p̣úḡ Sèṣi n̄iḡa d̄óòdi h̄in̄ka. ⁴ Ye wòni, kà Pidátì é ṭúm'òò béka è yò: A h̄á pú ṭèni màc̣m'èè? A baà you-ú-ma pà wei-sà wenni a h̄in̄ka-n'áa?

⁵ Àmá Sèṣi koò pú ṭéna màc̣mà, k'yé dii Pidátì dédéi.

Pà dèna n̄udi ḍènḍènni è yò pà kó kòu Sèṣi

⁶ Nùnṭiyèèma kúúdi weñni, Pidátì de h̄j̄ pà wéi kp̣enáku kùc̣j-dà, n̄iku de h̄j̄ n'kp̣èi-kú kú wéima. ⁷ N̄ido òc̣j̄n̄-dà h̄j̄ de péé kódedí meheká kà p'òò tonà Bàdàbàsì nà topúyupá t̄òpa. Pà de paḡ t̄òòdi-dà nà yotí wóopa hádí é yó kòu n̄ido kà p'òò kp̣edí n'èè kú kp̣émú. ⁸ K'yèè n̄iku é yídá é pón̄tá Pidátì h̄j̄ḡta é ṭèi òò còhu è yò ó pà wéi kp̣enáku kùc̣j k'yé n'yònà ò mà h̄ompú beeká weñni. ⁹ Kà Pidátì é pà béka è yò: Ne kp̣èi ká n ne wéi Sùwíf̣upa wódo-ò?

¹⁰ Ò de pà békáà mema mìi tee-sá, ò de yáá-ma sukú è yò, nà s̄s̄ekú kp̣émú-dà kà ḍhàka yaɔmma kp̣èmma de é taàa Sèṣi o n̄òta meheká. ¹¹ Kà ḍhàka yaɔmma kp̣èmma é fucí n̄iku è yò kú c̣hà Pidátì k'ò kú wéi Bàdàbàsì. ¹² Kà Pidátì é ṭúmá kú béka è yò: N'aá h̄in̄ n paḡ ba n̄idò ne yún-kò Sùwíf̣upa wódo?

¹³ Kà k'òò ṭéna kpeéma è yò: Ò kp̣éi kp̣íiḍokú h̄in̄ka!

¹⁴ Kà Pidátì é pà béka è yò: Paḡama m̄móma-dà ò paḡ-ma kà mà s̄ñn̄? Àmá, kà kú ḍhà é dedí kpeéma è yò: Ò kp̣éi kp̣íiḍokú h̄in̄ka!

¹⁵ Pidátì h̄j̄ de kp̣èi-má é nakàna ye n̄iku yàma tá, k'ò kú wéi Bàdàbàsì. Sèṣi menn̄, k'ò héé kà p'òò podí d̄óuka, é yòò k'ò ḳj̣j̄ n̄udi è yò pá taá òò kp̣éi kp̣íiḍokú h̄in̄ka.

Sòsipa ḍehikú Sèṣi

^r 15.1 Pidátì de yòh̄ tempáaku pà toò-ku Pàḍèsiṭin̄ yikànyido-dà.

¹⁶ Kà sòsipa é tódá Sèsî òò tanà Pìdàtì h̄j̄t̄à mùnku meheká, é yíí-ní sòsipa t̄òpa weñni. ¹⁷ Kà pà n'kpèi, òò báná tókesàdi h̄j̄gdí m̄dì, é yíí é òò poòma pókàta é yíná o yudí. ¹⁸ Ye kú dàhàka, òò d̄n̄ è tonà: Ñnadaà Sùwífùpa wódo!

¹⁹ Kà pà tódá kpadàkàdi é m'podì o yudí, è t̄h̄h̄ nuñt̄t̄í o h̄j̄nka, è hiù dúùka é té d̄j̄ háá-nà teñka o yihika. ²⁰ Pà ȳò-má o dehípu, é bátá ye tókesàdi h̄j̄gdí é t̄éná o neñti òò báná. Ye kú dàhàka, kà p'òò dèna tapaadi è kó taá òò kp̄j̄ kp̄íid̄kú h̄j̄nka.

Pà kp̄j̄ Sèsî kp̄íid̄kú h̄j̄nka

²¹ Yè de h̄j̄t̄à d̄j̄ò òc̄j̄n-dà yèni-nà-ní yèka h̄j̄j̄h̄í é yeèni ye kú còku. Àdèkìs̄ántì nà Ùd̄uf̄úsì pa báaa-dà, kà p'òò toò Sìm̄j̄j̄, k'ò yòn Sìdèni ȳt̄í kóoó. Kà sòsipa òò paá nà n̄òt̄i è ȳ ó toó-nà Sèsî o kp̄íid̄kú. ²² Kà pà tanà Sèsî bèmbèni pà toò-di K̄òkòt̄áà, m̄dì kp̄èi é n'ȳ-sa Yukókóku bèmbèni.

²³ Kà pà n'kp̄èi òò k̄j̄j̄ dìf̄j̄j̄, òò k̄k̄adà-nà m̄iñ^s è ȳ ó niì, k'ó yeda ò pú niì. ²⁴ Kà p'òò kp̄j̄ kp̄íid̄kú h̄j̄nka é yídá é taá o neñti t̄été è kó déhá bá m̄ènn̄ d̄èè-ko kó n'tee-tí. Ye kú dàhàka, kà pà t̄i totá. ²⁵ Pà de kó n'kó kp̄j̄ Sèsî kp̄íid̄kú h̄j̄nka k'yè yòn máàku màw̄i-dà k̄ányèñfa. ²⁶ W̄aáci pà de w̄at̄a-ci é daana o kp̄íid̄kú h̄j̄nka kà cì bekú ò yetà-sa kà pà k'òò k̄ù-nà de tonà: Sùwífùpa wódo. ²⁷ Kà pà péé òò kp̄j̄-nà niis̄j̄mma p̄ad̄éé kp̄íid̄c̄í h̄j̄nka. Òc̄j̄ o hiòma, t̄òò o c̄ànkamá.

[²⁸ Ma kú bookú-dà Weèdi wemá m̄èma toò-ma: P'òò kàn niis̄j̄mma meheká de paà-ma.]

²⁹ Kà n̄pa m̄èmpà k̄ah̄u-pa ye pesá òò t̄èu, è mákápú yuùka è tonà: Hei! F̄j̄n̄ m̄ènn̄ de kp̄èi-kó é p̄ódá Weèdi h̄j̄t̄à é madí t̄òta daa k̄at̄a meheká, ³⁰ f̄ih̄ina a c̄j̄j̄di, é cútá-ní ye kp̄íid̄kú h̄j̄nka!

³¹ Kà d̄h̄àka yañma kp̄èmma nà Weèdi kp̄éñt̄in̄uka bih̄anapá m̄è t'òò dehikú è cakú pa t̄òpa è tonà: Ò f̄ih̄inà-á-ma t̄òpa, è há pú kó neé é f̄ih̄ina o c̄j̄j̄di. ³² Ye Weèdi t̄akadáko-dà baà d̄è-à, Ìs̄id̄ayédì wód'aa, ó cútá-ní s̄amà ye kp̄íid̄kú h̄j̄nka-ní! Kà ti déhá miya, ye w̄oni ti k'òò n'dañ-ma. Pà de péè òò kp̄j̄-nà-pa kp̄íid̄c̄í h̄j̄nka, kà pà m̄è t'òò t̄èu.

Sèsî k̄úmú

³³ M̄id̄f̄i potà t̄j̄n̄ w̄oni, kà pa teñka é biikà ka weñni, é n'ȳòn mema háá máàku màt̄a yohokú.

³⁴ Máàku taáku meheká-dà Sèsî hodáa-ma kpeéma è ȳ: Èd̄oȳi, Èd̄oȳi, dàma s̄abàt̄an̄i, m̄dì kp̄èi é n'ȳ-sa: N Weèdi, n Weèdi badà tee k'á n w̄éi?

³⁵ P̄àc̄j̄ m̄èmpà de péé-pa ye pesá yeèkaà-ma mema, kà pà ȳ: Ñte-nà k'ò yún Èd̄i.

³⁶ Kà p'òòc̄j̄ é cocí-ní é t̄èni é tódá cebùti, é t̄i s̄èw̄a dìf̄j̄j̄ naàkp̄áñkp̄áñni meheká é t̄i bowá h̄ad̄ikú yóuma, òò k̄j̄j̄ è ȳ ó ȳà. K'yè d̄j̄ò ȳ: Héé-nà kà tí déhá kà Èd̄i kó t̄è'n̄'j̄j̄ c̄uh̄ina-ní ye kp̄íid̄kú h̄j̄nka. ³⁷ Àmá, kà Sèsî é hoda s̄ama, é kp̄í.

³⁸ Kùdáas̄apu m̄èmu de c̄anc̄i-pu Weèdi h̄j̄t̄a meheká, kà mú c̄étá é h̄j̄n màd̄éé, mu h̄j̄nka háá-nà mu teñka. ³⁹ H̄òd̄ómù sòsipa kp̄ènn̄ m̄ènn̄ de péé-ko ye pesá déhá-ma ò kp̄íkàama kú bookú, k'ò ȳ: M̄ómasí-dà ye d̄j̄ò de ȳòn-ma Weèdi b̄iítá.

⁴⁰ Kà poòpa p̄àc̄j̄pà m̄è t'èè péé è n̄hi-ní nà deuma è w̄ání. Pa meheká, Màd̄i Màk̄it̄ad̄á kóoó, nà Màd̄i, S̄àk̄i s̄am̄j̄n̄ nà S̄òòsì màa, nà S̄àd̄òm̄è, ⁴¹ kà pà de t̄unà Sèsî nà K̄ad̄id̄è-ní òò dehú, nà poòpa t̄òpa d̄j̄j̄di kà pà de p̄édà òò p̄ónt̄á-nà-ní S̄èd̄is̄ad̄èmm̄.

Sèsî dánáma

⁴² Yohokú-dà de deè, kà Sùwífùpa damuhipàdi hàn kà pà pàkú ni sòdo. ⁴³ Kà Sòséfù, Àdimàtèè yṗtí kóóó é tèni. Ò de yòn niisào-dà kà p'òò kèhi Sùwífùpa sídàpa yudí-ní. O móní, k'ò mèe té de ceí Weèdi wóòti tèmá-ní. K'ó potá kunnònfá, é taá Pidátì pesá é tèi òò còhà è yò òò pàṗ nùdi k'ó tódá Sèsî wònku é taá kù dáná. ⁴⁴ Pidátì yèkaà-ma è yò Sèsî kpíi, k'yòò dii. K'ó yíi Hòdómù sòsipa kpènn, òò béka k'ò kpíi k'yè de. ⁴⁵ Ye Hòdómù sòsipa kpènn ò cakaà-ma è yò ò kpíi, k'ó pàṗ Sòséfù nùdi è yò ó taá tódá o wònku é taá kù dáná. ⁴⁶ Kà Sòséfù é dontá kùdáapéíta, é taá cùhina-ní Sèsî wònku kpíidokú hínka, é kù pṗá ye kùdáapéíta, é taá kù tàa híúdi meheká kà pà nì tṗṗ tṗṗbeèdi meheká. Ye kù dàhàka, k'ó bídí tṗṗsàku é hínna ye híúdi nùdi. ⁴⁷ Màdí Màkitàdáa kóóó nà Màdí Sòsési màa, kà pà wán p'òò tàa-sa.

16

Sèsî yántáma

¹ Sùwífùpa damuhipàdi kàhà-ma, kà Màdí Màkitàdáa yṗtí kóóó, nà Màdí Sàákì màa, nà Sàdóméè kà pá dontá tùdàdépa nókpekú kpéepá, è kó taá pà pàṗ Sèsî wònku hínka. ² Yṗdi kányènfá pìdìpìdi, k'yè káà hṗn-ní pee-e, kà pá yódá é taá ye híúdi pesá. ³ Pà de békú pa tṗṗpa-dà è tonà: Wodà kó taá ti bídí ye tṗṗsàkù mènku hín-kù ye híúdi nùdi-ní? ⁴ Kà pá yoòda pa yuùka é wántá-ho ye pesá, é n'hṗtà ye tṗṗsàku bídí è dṗó béékú. ⁵ Kà pá tèi é dúú ye híúdi meheká, é déhá dapànn òcṗn k'ò kàdi hiòma, è báá tókedeudí péidi, kà wantafṗdi é pà cṗṗ. ⁶ K'yèe dapànn é pà caka è yò: Wantafṗdi dá ne cṗṗ. N toò ne penti Sèsî Nàsàdèti kóóó-dè, pà kpéi-ko kpíidokú hínke-è? Ò koò kṗó mìi, ò yántà. Nte-nà bèmbèni pà de ò dṗò-di. ⁷ Taá é caka-nà o dapàmma, nà pa kóóó Píyéè, è yò ò ne nihí Kàdìdèè teñka meheká. Míi-dà ne kó taá ò déhá-ma é n'yòná ò de mà ne hínpu. ⁸ Kà pá cemá é yeèni ye híúdi meheká, é nàa nòka mìi tee-sá pà de ceùdi-í-ma, kà wantafṗdi pà káá. Pà há de pú neè é mà caka òcṗn mìi tee-sá pà de wani-í-ma.

Sèsî bekáa o cṗṗdi Màdí Màkitàdáa yṗtí kóóó

[⁹ Sèsî de yántà-ma yṗdi kányènfá, é denà é beka o cṗṗdi Màdí Màkitàdáa yṗtí kóóó-dà. O kù meheká-dà ò de bṗṗhaà-ma weèkupá pàye. ¹⁰ Ò de ò fodà-ma mema, k'ó taá é mà caka-á-ma mèmpa de nṗṗ-nà-pa Sèsî, kà pà kàdi kà pa yàma cṗháà, kà pà kṗn o kpémú. ¹¹ Pà mèe de yeèkaà-ma kà Màdí yò, òò déhá-á-ma k'ò fòu, pà de p'òò fṗṗ hámbíifá.

Sèsî fodà o dapàmma

¹² Ye kù dàhàka, k'ò de é beka o cṗṗdi o dapàmma pàdèé è cèhèna wònku, kà pà péé còku hínka è kódi yèka hṗṗhí. ¹³ Kà pà de é koní é tèni é mà caka pa tṗṗpa, pà mèe té pú pà fṗṗ hámbíifá. ¹⁴ Dèndèma, k'ò beka o cṗṗdi o dapàmma píi-òcṗ, kà pà kàdi è yon. K'ó pà kṗi-nà, nà pà de kpekanà-ma pa yàma. Pà de pú taà dandaní mèmpa de ò déhá-pa k'ò fòu de pà cakaà-sa kù hínka. ¹⁵ Ye kù dàhàka, k'ó pà caka è yò: Cèn-nà teñka nà ka nùdi é caka Weèdi wenaamá nìpa weèni. ¹⁶ Mènn kó mà teha-kó é héé kà p'òò cóntá, kó fṗtá-ma. Mènn mèe kó mà yeda-kó, Weèdi kó wántá òò kṗṗ-ma yetádi sídàma meheká. ¹⁷ Nte mèmpa kó n taà-pá pa dandaní kó m'pàkú-pa

yípa: Nà n yèdi, pà kó bɔhà-á-ma wèèkupá, é wɛdá wemá boocí càn̄ci. ¹⁸ Kà pà cɛɛ wàci yoo è nì tekòùpu, yè pú kó pà pàá yèc̄fí. Pà té kó cɔná-ma pa n̄hi m̄kàpa h̄n̄ka, kà pá d̄étá kpekàma.

Sès̄i h̄n̄ka d̄isimá

¹⁹ Teó Sès̄i pà wèè-nà-ma mema é yòò, kà Weèdi óò yíkàna óò d̄ikàna h̄n̄ka, k'ó taá kaàdi ni hiòma. ²⁰ K'òo dapàn̄ma mempa é k̄ahá, é taá è cakú Weèdi wenaamá páàti wènni, kà Teó pà tempú-nà ye t̄mú m̄ehéká è p̄akú yípa, è bekú è yò pà cakú-ma wemá yòn bemú-dà.]